

卷之十八



荆溪記

溪江平渡二十里望上虞龍珠山翠色撲人三四曲爲金星吐月山陶家卜窰窰面前一山吐萼樹皆垂雲左一小山鬱起竹木森茂而一小崗尾之沿溪山二十餘乍起乍伏舉頭闕處則有遠岫補之水六七折溪田遠其中溪聲如近見樹根浮面宛若艤舟其下入畫則摩詰入詩則青蓮山不甚奇而峭水不甚濶而秀人家不多而山呼谷應日之夕矣牛羊下來境亦不寥

寂稍前則馮家浦若雉堞環拱而晚照沙平水  
波容與遠山皆碧霸王山突起江面山後修竹  
崇崗滙爲一湖如半月日照風帆如雲而東西  
兩霸王山可招臂呼蓋溪江水口二鎮山皆錯  
綉臨江一壁獨出江流八百束如駕馬而鬪一  
松兩巢如承露盤小浦藏舟綠樹爲家遙聞聲  
而思想天工造此溪山神慵意懶塗抹成峯巒  
唾餘是波浪傍溪諸山高者與屋平低者人行  
反出其上凌霄之樹可伯叔行初出之笋可兄

弟行如老人不耐行走持杖緩行常匍伏常跌  
坐宜閑雲數片往來其間亦宜遠眺山與雲齊  
江挾風湧令人目不敢視余方細聽溪聲落平  
田而舟人已指點東山在數行松樹間散髮披  
襟尋謝公見晉朝兩石將軍高約一丈五一神  
氣安閑一威武作色鬚眉如戟各執長劍各披  
虎甲腰玉環一劍作龍形一劍作鍾形臂結束  
帽下皆懸一帶束緊玉環之上更有一束寺僧  
云常走入村間今半身草泥中余盡搜而得

之初入嶺奇松十樹有二大石正襟危坐松枝  
倒舞懸百尺而下垂田畝聞環珮音一松折躬  
而上最奇峭先是風倒一枝枝猶在下去年雪  
壓一枝枝在上作蟠舞勢更可悅痛此爲小石  
門云纍纍而坐者西眺峯巒八松蟠臥則大石  
門國慶戒碑立其上稍上爲洗屐池池灣月形  
四環一澗池中勺水經旱不竭余自天台來無  
日不著屐茲遊獨晴又晚霽自此爲薔薇洞更  
衣亭荷花池亭池塘尚有芟草而路旁無洞聞

當年四面惟薔薇花結爲洞挾妓遊此故云洞  
前后五松一松倒垂勢直從西眺望狀若交頸  
洞口摸索五幹其上獨瘦舞腰肢疑美人影落  
再上爲龍牙石者二左牙尤逼肖上頂一小塔  
亦晉朝物小橋聽澗聲暗度一松和之殿前老  
梅一枝山徑漸深湖如片鏡抵僧房行二里無  
一人遙望僧房樓上間看山頭以手招之而出  
爲太虛上人登其樓見樓右殿之巔有屋三楹  
太傅祠也文靖中康樂公左襲封康樂公右皆

長髯風吹鬚動聞寺有百鳥圖以谷擲之僅存  
其糝又有嗣封公浴圖赤身裸立修髯過腹惜  
乎不見舊有古鐘鐘燬鑄爲邑塔頂惟殿後高  
崗晉永平元年僧法蘭書棋墅二字可珍若東  
眺西眺二碑隸字不知何人所書筆亦奇古余  
拜太傅公墓上西眺崇崗見戚家山王家渭山  
坐于江面山一從岷一從上虞一從董浦湯浦  
一從蒿壩一有琵琶州水港環流結成琵琶之  
形而水方沒澗隱于泥其聲靜悄可聽太傅自

山頂騎馬巡山路皆平曠曰調馬路余自尋大  
石門而下浮上東眺見鴉尖山下有靈芝湖遊  
人皆自西眺止余在山巔正觀落照舟移數十  
步觀泗州州亭坐指石崇巖中而一石雄踞臨  
江卽眺石也行廿里瞻顧不絕抵上浦人家雜  
紅霧中落照餘霞數道十里遊仙又十里卽蒿  
壩云橋壁五里壁有夜光見壁下持燈者月照  
帆影波容零碎至東關過舟畱一隙觀樹

剡憶

自陶堰抵蒿沙際灘江聲臥月色二十里爲東  
山孤嶼幽溪流幽山夾千流爲剡溪嶠浦入剡  
以舟勝過清風嶺王烈婦初至正間千夫將執  
其夫與舅姑殺而將之婦求死不得給曰願服  
期月之喪許之兵適剡過此嶺噴血痛哭作書  
投崖下死近崖居民皆戮至今不寒而慄神能  
誘致倭入廟戮于官兵焉

三十五里至新昌新昌鑿石爲大佛月巖劈一

罅如窻櫺中秋正當崖罅罅有二松余在會稽  
見陶石簣坐千錐萬鑿中甚爲不平今佛亦不  
免况佛子也前有俊猊二石甚古錢忠肅施錢  
以八千萬貫計會稽原是真山水近體在山遠  
神在水今幻作花園又幻在書舍太損自然剝  
流入娥江隔鑑湖一堤儘堪致棹興盡而返何  
爲者哉稱剡又或稱嵯云出剡南郊渡石橋橋  
長三百餘丈日涉萬人天姥嶺萬馬渡一束山  
水慵懶之意爲之整肅故萬年寺之有九里坑

也是乾坤寒冰金玉之所結也

過新昌從桃墅而徑幽絕水咽于石戛之微鳴  
宿斑竹嶺爲談斑竹童生亦一奇云某查盤理  
刑過江忽見嬌童自錢塘匍匐迎若急欲訴者  
詢之無言每日手持佳茗送于路某公嗜茗道  
傍多渴甚樂之及抵斑竹乃自言其里在云滕  
行而道之入洗腆乃公問所顧曰欲府取耳於  
是感慨曰爾意至不薄矣而責報甚廉而殆非  
今人也竟以故青青其衿至今稱斑竹童生又

有一事酷相類山西某別駕滇人也以馬市來  
吳停舟京口見金山寺一老僧搖櫓送致忙曰  
好人好人酬之一金亡何北固山僧送菜合掌  
贊嘆酬之如初未幾諸山移樽疊而來者趾相  
錯于路舟橫于叢葦之中也搖手曰好人何其  
多遂解維而去會墅嶺左太平蓋多巨竹

荆溪二十一洞記憶

石磬洞如雲亂飛中懸一石擊之磬也 三珠  
洞在其傍玉女潭潭水澄綠煙樹蒼茫樹根如  
石蹲枝葉皆成峰巒獨孤及日日思瓊樹卽此  
龍湫洞可舟舟敗僵臥一望杳杳或云可十  
里兩崖一壑 白蛇洞白蛇啣茶古詩翻使山  
僧怨白蛇我不任怨 白鹿洞洞口有田旱則  
禱而泉出以肩斗從訕然一聲卽止 棋盤洞  
懸一線天天然布棋行步時作棋聲 白鶴洞

口極隘以屨先兩人掖其首入洞水深一二尺  
石倒垂如千葉蓮及爲藥爲房不可計水深處  
一大士危坐僧與僕皆不能從 大成洞近洞  
一椐甚大藤抱等入洞數武絕澗劈開懸二尺  
高下濇滑各矗一石僅屨又數武左峯右窪一  
石劔橫側足行稍前劔橫其腹稍下傾過此臥  
一大石洞口老人曰下有秘書會手揆其鑰獨  
石爲關肩而上有金山雪山山足微黑似艸樹  
蒙茸出登一最高處陟數險級一大士玉立侍

從皆玉結爲蓋垂纓絡亦玉凡洞之妙莫奇於  
頂或天風海濤或槎呀古木或錦鱗蒼蘚此洞  
竟莫能名高而峻也歷盡險阻出洞猶怖者數  
日 仙橋洞夾峙如空中行走洞有龍日夜鳴  
倚水中石聽之大抵荆溪洞最深處卽有一龍  
穴焉不敢窺矣 天窟洞佛耳洞記得一石兩  
穿雙懸日月未知何洞 張公洞從後門入洞  
口下上皆鬼道有如青驢跡者曰張仙人騎也  
仙之堂曰前曰後仙之房曰左曰右堂前簾數

重珠垂乳自頂倒垂自地壁立相去者或尺或寸其象似家堂似燕巢似執笏似受詔似拜鼎似立鳥不可舉所過僊廚仙床周以雕闌鋪以繡被此東仙房之奇仙人硯一石數形各有勺水仙人浴具巾幕寶塔七層此西仙房之奇石根迸裂忽開一天琪樹四鬱有許用晦洞靈觀冬青樹詩洞之前門高崗一望平湖萬頃矣天申宮旁一石摩之皆桂香 善權洞口古栢數行如鐵殿無梁柱有雷書可醫癖

殿柱間俱火筆倒書一曰

史米漢謝鈞記一曰史米漢謝鈞之記深五分雷部筆昉於唐 殿旁一石分兩

水一似瀑布一似珠簾不知水何來洞頂若虬龍至高處水沸如雷不見水次晨行里許石級而下洞門弘奧如架天作橋五六有一雪簑達磨最特鹽房米廩仙田絕似畝齠彊畫洞底皆水砰礮甚乃知沸如雷卽其頂之上名旱洞此稱大水洞而殿旁一石兩分之水卽從此出名小水洞者也山有九峰狀如九斗曰九斗壇金鵝洞近洗腸池亦法師迹也 君陽洞從平

地觀之百尺之上皆潑水形知爲蛟跡 品洞  
大成一白鶴二張公三善權四 大成仙家與  
室張公仙家花園白鶴仙家池沼 玉女潭如  
美人臨鏡尤愛瓊樹終日不能去記得摩娑其  
下月色皎然 時維九月 湖汝鎮初覓輿人一駭而  
力驍醉能拔屋及執輿甚恭凡奇險處皆得其  
力天申宮敏上人酒猛飛渡如猿猱然 余遊  
西洞庭累月顧其靈詭處恐不逮荆溪余所知  
二十一洞 已志三四 其餘環山皆洞也不能悉數之

矣 諸洞相去有三四里有遠至七八十里所  
過琅玕夾道常數里溪水如畫 敏上人以大

成洞怖余余以獨遊白鶴洞過之上人讚服不

已 敏上人遊興極捷所以不能入者洞口隘洞  
府水洞門棘深數丈數十年絕無人跡矣

玉女潭僧寒儉不能飯治山花一盂雅稱其潭  
張公洞僧僅存米七合白酒一壺相與忍飢危  
坐竟夜遊洞無可記其佳處曰怪其極佳處曰  
極怪而已記者紛紛都可廢也山水人物一一  
現成遊人觸之爲添一欵笑耳

荆溪小說緣起

鼠齧洞記都盡而說猶有存者

余一日自芙蓉寺上銅官抵自然菴晚矣將宿南岳蓋十里已過其半虎大吼且逼從行皆恐又黃昏無月虎愈吼不能步忽一人持刀下益怖徐察之乃捍虎者耳其人勞苦余返自然菴作七十二小說一夜聞麀鹿無雜聲次日過南岳僧指點虎吼處在兩山之界行者必趨與爭只尺及南岳訪洗腸池池故法師剗腸自洗以服虎者也初上銅官山步行二十餘里如

龍脊上走又攝於虎銅官絕頂卽樵牧不至袁府君墓俗傳漢時天葬銅官處此山初見二九次百二十瀆出又繼太湖如杯水湖上諸峰如鳥影數十仞之山匍匐伏

### 說義興郡

義興城今縣治漢名陽羨至晉永嘉以周玘頻興義兵三定江南分陽羨臨津國山義興永嘉世平陵六縣立義興郡統之表玘功也移陽羨於君山下以今縣治爲義興郡唐以郡爲州縣而

君山陽羨廢有臨津城國山城義鄉城宋改屬  
長興永世城宋屬丹陽今屬溧陽平陵城亦在  
溧陽綏安城屬長興蓋長城凡七許有穀詩幾  
處城荒舊堞崩春山那復想平陵只今雖有長  
橋月猶付前人說義興 陽羨館舊名迎華驛  
在長橋北南臨荆溪唐張祐次荆溪呈崔明府  
詩云艤舟陽羨館謂迎華驛也亦名荆溪館唐  
嚴維宿荆溪館呈丘明詩宋紹定初令趙與愨  
因取祐詩改驛爲陽羨館後名西館驛

### 說長橋

王公升長橋攷長橋在縣治前初創自漢袁府  
君卽斬蛟之所徐鉉長橋記對縣樓而直出跨  
荆溪而橫絕陽羨治所更六朝以還爲郡爲州  
爲守禦之治改易不常而橋之虹亘恒於故處  
元豐二年火四年令褚理昂新名曰忻濟蘇子  
大書其榜曰晉平西將軍周孝侯斬蛟之橋仍  
旁寫李贇皇長橋詩刻石道左崇寧禁錮禍作  
沈其石於溪水或因唐李華賦此橋詩有雲雨

生泉窟雷霆落劍鋒之句似不類今日遂疑茲  
橋非古此不察荆溪廣狹今管異也荆溪獨橋  
南一路可通車馬橋自西迤東渺茫烟水今東  
關潭最其深處蛟疑窟於斯孫權始築陽羨城  
周遭才一里九十步僅包縣治而已管水大而  
城小今水小而城大蛟橋風景安得不改 白  
珽題斬蛟橋詩云蘇公百世士豪氣有相似泊  
舟蛟川下洗石題所以平生疾惡意十有二言  
裏指蘇榜言也 長橋下舊有白獺若出穴四

望而嗥則爲兵兆神而祠之今廢

說山水

義興山長水遠余今所存者鼠之餘也十忘其三矣

山姥山

縣西六十五里

漢封蔣澄爲山亭侯因家焉朱

子贈山巡檢詩

國山名離墨山

縣西南五十里

孫吳

時大石自立又有石裂十餘丈皓封之改名國

山立石頌其形鼓篆文遶南岳山

縣西南十五里

孫皓

旣封國山遂禪此山爲南岳取漢武移衡祭灋  
霍之義卽古陽羨採茶處循南岳而上十餘里  
爲銅棺山卽君山袁府君天降銅棺處也一曰

山產銅曰銅官

龍池山

縣西南七十里

峭壁千尺有

伏虎石分賓亭凌雲閣一源巖龍湫石雞冠石

白雲巖有上菴中菴旁有龍池池多蜥蜴又二

里曰下菴

余游雨晨起將陟又雨

荆川記自龍池出往

石屑二山夾澗山高百餘仞澗道濶四五十步

人家緣澗以居唯亭午見日色從西霞可入舟

石山

縣東南二十里

晉司馬時有大蛟孕子剖其殼

可容三斗嵌空成穴長流溉田山有水洞 願

山

縣南三十五里

忻溪後百餘步陸希聲隱居此山東

走震澤有魚象 太湖山有金雞墩有洞沈暉

詩太湖西擁大潮山萬丈青蓮一水環楚山與

大潮山亘而西

蘭山

縣東南五十里

山有石麓東入

太湖五里隨水盈縮以為隱見子山在其西北

趙孟頫詩弁山橫雨外笠澤湧天東 甌山即

君山一枝

縣西南二十五里

其形甌雲騰若炊梁蕭子

雲詩次寥晚霖霽重疊晴雲深庾肩吾詩寒雲

間石起秋葉下山飛 烟山

縣西南五十里

諸峰環峙

西碧雲南羅漢北雞籠東紫雲上有漁磯下臨

溪谷孫堅常釣於此 章山縣西南七十里近沸泉武

花二山連亘蜀山屹然特立原名獨山蘇文忠

公愛其風景類蜀故名有書院望見太湖銅官

諸山如列大屏 金鵝山計山東北相連屬管

有金鵝飛集此山唐改義興為鵝州取此 陽

山縣東北三十五里多縱石而有大橫峴以承流上有

子隱試劍石兩膝着處皆窪 浮山縣東北三十五里

兩峰對峙三面溪流環遶因為浮峰蘸碧 礪

山縣西南九十里自小心山連亘而起下有金泉礪承

小心山土如金流入慈烏溪張祐詩決水金沙

碧梯雲石壁虛 丁山縣西南三十五里或曰甯戚墓

孫覲艤舟詩宿鳥來還去微泉咽復通 楊梅

嶺縣西南二十里昔產蜜楊梅郡以入貢任昉至謂其

病民奏革之 太湖縣東四十五里南踰蘭山抵薰塘

嶺入長興界北越竹山抵百瀆口分水墩入武

進界其占本縣東境者百里而遙屬七十四瀆

西連諸水下注三江以達於海 太湖最大者

二一自寧國建康等處入溧陽至長蕩湖并潤

州金壇延陵丹陽諸水會於宜興以入一自宣  
歙天目諸山下杭之臨安餘杭湖之安吉武康  
長興以入而皆由吳江分流入海惟寧國建康  
因有東壩不注此矣詩云天邊時白鳥烟外忽  
青山 渦湖 縣北四十里 與武進縣中分南通荆溪  
接溧陽金壇皆有渦姓者携龍殼歸地遂成湖  
嘗遇烟霧或見蜃浮風浪湧 洮湖 縣西北百里 郭  
璞江賦云具區洮渦 荆溪 縣南二十步 受溧陽金  
壇 縣北 下注震澤荆溪山水之勝善權離墨銅

官諸山岡隴起伏具區滙其左茗雪引其前巖

維詩銅官之山溪水南周處廟前多夕嵐看捲

雲帆歌白苧勸嘗春酒破黃柑 西溪一名西

九 縣西關外 廣德溧陽金壇諸山澗水滙此貫城繞

郭以下太湖其長幾三十里 東溪一名東九

縣東關外 西南諸山水從西來而下太湖滙此任昉

詩交柯溪易陰反景澄餘映許渾詩水寒深見

石松晚靜聞風 洑溪 縣東三里 源出君山北入荆

溪水勢洄洑 東瀉溪 縣東南三里 陸希聲顧山

錄謂山前百步衆流合而東任昉詩長溪水東  
舍顧況詩家住義興東舍溪溪岍多藤花盛時  
映水中青綠可愛故名罨畫溪一名蒙溪一名  
五雲溪齊高祖詩披襟罨畫溪頭月獨孤及詩  
萬峰蒼翠色雙溪清淺流許渾詩佛廟千巖裏  
人家一島中 忻溪 縣西南四十五里 產水菖蒲兩溪  
多石其土骨如石解縉詩翠禽啼處烟如織錦  
籜裁來雪未消 逆沙溪 縣西六十里 出山山入白  
雲徑高直詩風急長帆投極浦日斜一鴈下平

沙 后袁河 縣西南二里 袁令開以避西溪之險

閃溪河 縣西北三里 林御史浚以避西九 通澤河

縣東二十里 馮令避東九之險西接荆溪東連震澤

單錡水利書自蕪湖溧陽伍堰達吳江猶人之  
一身伍堰爲首荆溪爲咽百瀆爲心震澤爲腹  
旁通震澤衆瀆則脉絡衆竅也吳江則足也今  
上廢五堰之固而宣歙池九陽江之水不入蕪  
湖反東注震澤下又有吳江岍之阻而震澤之  
水積而不洩記云岳國君章雄麗峙於前都柯

陽計蜿蜒拱其後兩溪夾翼於肩脅百瀆分疏  
於尾閭西北則洮瀾遠引乎三江東南則具區  
震蕩乎二曜 寰宇記宜興山長水遠此一評  
可作一部荆溪志李端詩送宜興路長人返顧  
草盡燕回飛張佑詩山暝水雲碧月涼烟樹青  
長橋深夜影遠槽下溪聲皇甫冉詩酬裴舊國  
想平陵春山滿陽羨題高雲客舍惟將山與水處處  
諧真賞三月三日同義舟處處藝蘭春浦綠萋萋  
藉草遠山多送明府泛舟歸義興長帶溪沙淺時因山雨

溪皆可誦也若姚舍詩送喻校書歸陽羨山春烟樹衆

江晚遠帆疎孫覲詩題溪亭雲蘿屬地青霞帔雨

茨填溝赤岍錢方干詩贈陶詳隱居陽羨竿底細鱗輸

釣伴花邊白犬吠黃鶯李嘉佑詩淺溪通野水

綠茗滿春山王昌齡東溪翫月澄清入幽夢影

破抱空巒白居易送李較書寒食歸義興山居

到舍將何作寒食滿船唯載樹陰歸趙孟頫詩

初日出雲光射地雙溪入湖波接天若太白綠

水清以閒白雲有時來句可謂遊過荆溪數遍

也 方逢時義興八景有序云壯年竒趣消磨  
漸盡追憶舊遊慚無惠政而佳山佳水自知無  
恙也八景曰龍池夏雲蛟橋秋月泝泖雪簑國  
山烟寺陽羨茶泉畫溪花浪玉潭凝碧銅峯疊  
翠

### 說長吏

袁玘東漢會稽人爲陽羨長生而神靈能逆知  
水旱而預爲之備無疾卒於官葬君山巔災沴  
輒禱境內多虎患邑令趙與慙至未幾卽空其

群旁邑之害亦息漫塘劉宰爲賦殺虎行以遺  
觀風者 袁道成化間令知民苦西九風波乃  
循九之南鑿夾河起土千至泝泖延袤三十餘  
里名曰後袁河媿前漢令玘也 任昉泛溪有

絕物甘離群句固以名其村

離羣村

李堅詩好風

吹句落烟邨便作棠陰記使君昉爲太守禁產  
子不舉及代維絹七疋米五包釣臺西溪濱外  
政暇垂釣焉訪到洽於田舍 桓玄嘗登高望  
震澤嘆曰父爲九州伯兒爲五湖長遂棄官歸

志又稱其爲義興太守鬱鬱不樂 太白從孫  
李銘宰義興白贈行詩落筆生綺綉操刀振風  
雷余按詩雪會嵇耻奔宛陵道忠義憤然其曰  
能文變風俗好客留軒蓋賢吏也 郡守陳密  
學襄墓在箬山去郡後卒葬於此孫莘老誌其  
墓邦人德之州縣歲時遣祭淳祐八年郡守李  
迪爲文屬令丞修上塚禮今廢祠之學宮

### 說風俗

朱元晦詩歲稔村村樂官閒事事宜又云縣人  
學子知所向慕東坡云地褊俗險舊志云男子  
不遠遊婦女不交易士夫不衣文綉不乘輿馬  
皇甫冉詩風俗猶傳晉永和 正德己巳宜興  
仕而歸者十一人城東孝侯祠有崇丘茂林深  
池廣陂副使邵公寶面丘作堂環以樓閣與諸  
老觴咏其間王文恪公過而歎焉

### 說古蹟

青箱雜記載南塘徐鉉至義興讀漢太尉許馘  
碑其陰有八字云談馬礪畢王田數七莫曉其

旨鉉云此謂許碑重立也 泚泚浦中有漳浦亭晉以爲周扎封邑許有穀詩勲名常帶一溪橫 李司空山房在善權寺司空名蟻嘗於此肄業後李魯伯李綱相繼寓此皆李姓寺有三生堂李刺史玉潭莊卽玉女潭刺史名戡唐渤海恭王之孫登進士第拜刺史終隱於此 蔣三舍在縣西泚泚浦中址尚存宣和間張寶文彥智遇風寄宿題詩云兩岫更無通步路四時常有避風船 乾元初有三到亭大毓禪師常

此駐錫與龐居士問答宋紹興八年了禪師爲記有龐居士三到斯山之語 到氏查林洽漑兄弟居太守偕遊曰蘭臺聚 邊莊南唐封域止此屯戍守之一名石門 茶舍舊在菴畫溪南莊蔣穎叔置義田處 東坡別業在瀾湖塘頭

### 說茶

唐御史李棲筠守常州山僧獻陽羨茶會客嘗之野人陸羽以爲芬香冠絕他境可薦尚方遂

置茶舍歲進萬兩可惜此茶恰遇此客顧況居  
茶舍詩家住義興東舍溪溪邊莎草雨無泥  
李嘉佑送陸士倫之宜興詩淺溪通野水綠茗  
滿春山張籍茶嶺詩紫芽連白蓋初向嶺頭生  
唐歲貢陽羨茶萬兩元貢薦新茶九十觔歲貢  
金字末茶一千觔茶芽四百一十觔 國朝薦  
新細芽茶一百觔續郡志云洪武十年歲貢芽  
茶四十觔葉茶一萬三千觔今每歲止進芽茶  
八十觔南京禮部二十觔白蛇之怨吾知免矣

西石亭產梅

石亭  
埠

陳克詩石亭梅花落如積余

閱武林誌宋大內植梅二本其一本來自張公

洞絕佳 保安禪寺殿前垂栢連數抱而中剖

余觀龍池老幹焦燒肌理盡裂大成洞老藤擁

擗圍抱如一再宿玉女潭飲獨孤及日日思瓊

樹下根爲石如寒崖積雪 獸之屬虎 豹

鹿 麀 麕 狐狸 兔 野猪 蝟 獺

獾貉

說怪異

毛萇游張公洞自洞穴而入至洞底東至太湖  
中洞庭山得石穴而出山上有毛公洞有毛壇  
鍊丹井萇自言洞中東行聞頂上有風波聲及  
舟人語 姚生常遊張公洞秉燧而入遇二道  
士對奕指青泥數塊啖之咀嚼芳馨道士曰可  
去矣懷其所餘出遇賈胡驚曰此龍食也 申  
屠有涯携一磁瓶自吳遊楚脫衣附舟飲酒大  
吐衆逐之有涯曰風雪如此棄我何之挈瓶登  
岼躍入瓶 乾符中王氏女居湖沒桂巖山不

嫁一日微疾題詩而去及舉棺甚輕啓之存履  
而已 洗腸師開元間築菴南嶽忽膝間聞嬰  
兒聲下山得婺婦與偶生二子一日晨炊俾復  
進羹妻辭以盡曰非羹盡乃緣盡也復取衣錫  
歸菴衆僧不納師偕二虎與衆決去留衆懼請  
止師乃剖腹出腸洗之有洗腸池 負鵝者遇  
一書生云足痛求寄鵝籠去許之與雙鵝並坐  
負之亦不覺其重前至大樹下乃辭去 冲寂  
觀故陶選宅井有白兔升天因捨爲觀真人插

蘆於地枯蘆成葦曰會真菴 唐道士許堅題  
於壁浴瀉湖凌波而去 宋一縣吏家臨荆溪  
得白螺自縣歸見飲膳備具螺化婦 劉商彭  
城人第進士歷尚書郎性冲淡以病免至廣陵  
遇異人授藥九粒如粟食之不飢渡江遊茅山  
至義興訪張公洞罨畫溪極愛賞遂隱湖沒渚  
後樵者見之曰我劉郎中也莫知所終

說人物

徐鍇周將軍廟記君字子隱義興陽羨人晉鄱

陽太守魴之子少跣弛任俠嘗感父老之言以  
南山之虎長橋之蛟并已爲三害於是入山殺  
獸旣而搏蛟浮沉三日竟斷之而出入吳尋二  
陸師之朞年州府交辟及居近侍糾劾不避寵  
戚梁王彤違法君深文按之齊萬年反權臣惡  
君之強直以君討之及六陌之役梁王爲帥軍  
人未食彤促令進絕其後繼君自知必敗賦詩  
曰去去世事已策馬觀西戎藜藿甘梁黍期之  
克令終言畢遂戰自旦至暮斬首萬計絃絕援

窮歿焉 周廟古碑刻平原內史陸機譔右軍  
王羲之書有疑贗者史言力戰死元康七年正  
月碑載九年奄捐館舍史言成都王殺陸機機  
歿十七載而爲此文史三子碑四子史年五十  
六碑年六十二他情事多不類永叔以爲弘景  
華 射虎亭子隱射白額虎處斷蛟曝皮俗稱  
餘波滄焉 宋元祐初沈諲夜夢周侯語曰雀  
污我耳汝爲拭之吾賜汝一指力及旦往視果  
與夢符諲以布拭自此勇抗百夫宣和間盜犯

境神叱曰我平西將軍也盜遂去適嘉靖海寇  
戒嚴侯墓去地數丈有飛虫成團儼如旗幟搃  
拽樹杪 國朝洪武詔去舊號題袁木主曰漢  
陽羨長袁公之神題周木主曰晉平西將軍周  
孝侯之神 建炎庚戌虜寇常州是年春巨賊  
郭佶等犯宜興岳王提兵過金沙寺題壁云余  
駐大兵荆溪陪僧寮謁金仙徘徊少憇遂擁鐵  
騎千餘長驅而逝異日復三關迎二聖使我宋  
中興得勒金石重過此豈不快哉其後矯詔殺

王子雲亦棄市次子霖自九江之宜興邑父老

乃知沈坡字於荆溪非荆溪父老

家於邑

之唐門沈周詩長林高塚空山裏風雨時時聞  
甲兵今人類知滿江紅一詞而建炎數語固宜  
碑之銅官絕頂以屬袁府君 姚峇德祐元年

家居宜興適元兵圍常州守趙興鑑遁州人王  
良臣等以城降嘗與陳炤等謀起民兵二萬力  
戰死有僧莫謙之亦起死之 元孽梁王據雲  
南學士王禕歿之 高皇帝再遣吳雲持節招

椽郡中稱賢吾何敢犯遂委去太守黃兢舉孝  
廉和帝時稍遷桂陽太守嘗行春來陽縣有兄  
弟訟財荆上書自劾後皆感悟 吳達嫂亡傭

直給喪從弟欽伯以歲飢夫婦被畧達自有田  
數畝鬻贖之郡命爲主簿遜其兄又以先世舊  
田讓族弟弟亦不受棄爲閒田建元三年詔表  
其閭 陳玄子四世同居一門百有七十餘人

建元三年廉使上其事詔表其門仍蠲租賦

右孝

友 唐薛登天 壽中累遷補闕時選舉濫甚上

疏武后不納僧慧範怙太平公主勢奪民邸登  
劾奏反爲主所構出岐州刺史 王安石當國  
司馬公極論新法之害一日語邵材曰劾去司  
馬大官可立待材毅然曰君實正人也可厚誣  
之乎安石艷然卽自劾歸 右正直 唐蔣洌與弟  
渙並舉進士洌官至尚書左丞歷官鴻臚卿日  
本使者嘗遺渙金帛不受唯取箋一幅爲書以  
諭其副 吳玉由歲薦入國學任戶部主事權  
課淮上雖族姓親故弟舶往來毫無徇縱卒於

官旅襯歸蕭然破簾而已敝廬三間兄弟共之  
李庭芝嘗同業師許恒應南試恒暴仆闈中庭  
芝哀慟卽投卷負其屍出累官平樂知府致仕  
家徒壁立妻子饑寒李應禎過荆溪訪之時方  
踞爐煨芋相對話舊埃熟啖之而去邵天和正  
德初繇庶吉士授吏科給事中時劉瑾竊政連  
差勘問外官事比復 命瑾怒其不株參不納  
賄啣之嗾山西查盤張御史劾其受平陽府餽  
爲民瑾誅事白復符丞使所至以清白稱卒於

官寮案爲發其囊僅銀三錢右廉慎單錫常修本

邑風土記傳於世蘇軾愛其賢以女兄之子妻

之來宜興每寓其家單錫錫之弟嘉祐四年

進士嘗著吳中水利書書成蘇軾錄進於朝不

果行遂隱居不仕右文學張秉時顧劭號知人

一見遂友之劭爲豫章太守瀕行從者百數人

秉疾劭辭曰張仲節以疾不克來當與別諸公

幸少俟右行義馮處士失其名曹唐有贈南嶽馮

處士詩二首云白石溪邊自結廬風泉滿院稱

山居鳥啼深樹斲靈藥花落閒牕看道書烟嵐

晚過綠裘濕水月夜明山舍虛支頤冷笑緣名

出終日王門強曳裾寂寥深木閉烟霞洞裏

相知有幾家笑看潭魚吹水沫醉嗔溪鹿喫焦

花穿厨歷歷泉聲細繞屋悠悠樹影斜夜靜着

灰封釜竈自添文武養丹砂失其名皇

甫冉送蔣逸人歸義興詩云驚湍流不極野渡

識雲岑長帶溪沙淺時因山雨深方同七里路

更逐五湖心揭厲朝將夕潺湲古望今花源若

許到雖遠亦相尋 陶詳較書隱居陽羨方干  
贈詩云芸香署裏從容步陽羨山中笑傲情竿  
底細鱗輸釣伴花邊白犬吠流鶯 宋王克嶷  
隱居不仕王安石贈詩二首云荒村日午未開  
門雨後餘花滿地存世上但能旌隱德無人知  
道是王孫童子穿雲晚未歸誰收松下着殘棋  
先生醉臥松花裏春去人間總不知 元簿幼  
業進士輒棄去自號耘軒有歲後書懷云他鄉  
故鄉老若此新歲舊歲窮依然烹茶但有二升

水沽酒初無三百錢

右隱逸

到洽彭城武原人

覩世方亂拒薦不就隱陽羨幽居積歲任昉嘗  
訪洽於田舍見之嘆曰此子目下無雙 薛戎  
河中寶鼎人客陽羨山中四十餘年不仕觀察  
使李衡辟署幕三返乃應多吏蹟 杜牧京兆  
萬年殖產陽羨因卜居焉有贈李侍郎詩并小  
序 李侍郎於陽羨里富有泉石牧亦於陽羨  
粗有薄產敘舊述懷因獻長句四韻冥鴻不下  
非無意塞馬歸來是偶然紫綬公卿今放曠白

頭郎吏尚留連終南山下拋泉洞陽羨溪中買  
釣船欲與明公操履杖願聞歸去是何年李  
幼鄉大曆間以右庶子官守滁州嘗於義興王  
潭作山居與獨孤及屢有倡酬陸勳常寓義興  
李郢秋晚寄題陸勳較書義興禪居詩有蘇房  
檉架掩山砌石盆欵句陸希聲相昭宗避亂  
隱陽羨湖汶名其山曰願山著願山錄及山居  
二十七詠蔣穎叔題其宅詩有云二十四亭蕪  
沒盡溪邊猶有故時橋有山居卽事一首云君

山蒼翠接天冥東走江湖上洞庭茅屋向陽梳  
白髮竹牕深夜誦丹經湧泉回沈魚龍氣怪石  
驚騰鳥獸形爲問前時金馬客此間還作少微  
星皇甫冉丹陽人天寶中登進士調無錫尉  
避亂居陽羨歸陽羨兼送劉八詩湖上歸航別  
江南謫宦歸前程行更遠臨水淚沾衣雲夢春  
生遍瀟湘客過稀武陵招我隱歲晚向柴扉酬  
裴十四淮海每聯翩三年方一見素心終不易  
玄髮何須變舊國想平陵春山滿陽羨隣雞莫

遽唱其惜良夜晏

高陽寓陽羨皇甫冉題其

客舍詩云吳國滯風烟中陵延夢想惟將山與

水處處諧真賞

顧況姑蘇人嘗居義興茶舍

有贈僧詩云家住義興東舍溪溪邊莎艸雨無

泥上人一向心入定春鳥年年空自啼

孫泰

山陽人嘗以二十萬錢置別業於陽羨俾原主

他徙一老嫗哭甚哀泰憮然卽以所居還之

東坡與蔣之奇同第宴瓊林日坐相接爲說荆

溪山水坡公心動邑人單錫同年進士軾以甥

女妻之屬置田夫求田問舍且在瓊林宴上坡

固不妨後謫黃州移臨汝上章乞居陽羨嘗託

邵民瞻買宅聞嫗哭而折券自是不復問舍寓

顧塘橋孫氏之舍而歿噫子瞻巧於買山之奇

巧於卜隣單錫巧於娶嬾邵民瞻巧於居間顧

氏巧於居停乃嫗亦奇嫗也豈卽向孫山陽哭

者耶

山陽孫泰以二十萬錢置義興別業聞嫗哭而還之

公題吾來陽羨

入荆溪意思豁然殊快平生之欲逝將歸老逸

少云我卒當以樂死

其言驗矣

吾性好種植能手自

接菓木尤好栽橘陽羨在洞庭上柑橘載至易  
得當買一小園種柑橘三百本屈原作楚頌吾  
園若成當作一亭名之曰楚頌數語便是一幅  
荆溪好山水菩薩蠻詞買田陽羨吾將老從初  
只爲溪山好來徃一虛舟聊同造物遊有書仍  
懶著且復歌歸去筋力不辭詩要須風雨時噫  
從初只爲溪山好却只是信得蔣先生一席話  
蒙恩放歸陽羨作滿庭芳一篇歸去來兮清溪  
無底上有千仞嵯峨畫樓東畔天遠夕陽多老

去君恩未報空回首彈鋏悲歌船頭轉長風萬  
里歸馬駐平陂無何何處是銀潢盡處天女停  
梭問何事人間久戲風波顧謂回來稚子應爛  
汝腰下長柯青衫破群仙笑我千縷桂烟簑余  
謂荆溪前人寄題多不似如清溪無底天遠夕  
陽多何可多得望湖詩西風片帆急墓靄一山  
孤又云岷峨家萬里投老得歸無笑謂投荒萬  
里卜居萬里要他煩惱除是無山水處 荆溪  
寫景鳳栖梧桐山秀芙蓉溪明罨畫直遊洞穴

滄波下臨風慨想斬蛟人長橋千載猶橫跨解  
珮投簪求田問舍黃雞白酒漁樵社元龍非復  
少時豪耳根洗盡功名話嗟乎子瞻胸中亦有  
功名兩字礪山長泉詩不能濟世人沉沉味寒  
碧元豐七年艤舟慶源亭有求書者既作數紙  
題其後云早發宜興飲酒一杯醺然至醉置拳  
几上垂頭而寢不知舟出門外泊於慶源周必  
大題橋頌帖元豐九月抵宜興十月六日寫此  
帖聞通真觀側郭知訓提舉宅卽公所館不知

凡留幾日也噫買田未了賃居未了作亭未了  
臨風慨想斬蛟人君恩未報如何了徐溥跋

東坡手書吾鄉山水佳勝昔蘇文忠公愛而居  
之故其名益著公之居此其事特見於文集與  
郡志中至訪其手蹟僅有所題斬蛟橋八字而  
已若此種橋一帖乃長洲李應禎携以示予者  
竊喜此爲陽羨故事也遂用摹刻於石蜀風

在縣西北  
四十五里韋莊蜀程記云至寶雞縣過三疊坂

田疇村落酷似義興境物因名蜀風李堅詩勿

訝韋郎誇酷似情知蘇子賦歸來  
杜牧之詩

贈李侍郎

陽羨溪中買釣船序云侍郎於陽羨里富

泉石牧亦粗有薄產又云義興近有水榭予謂  
陽羨尺水片石可珍卽一艸一木一廛一畝亦  
可珍邵二泉憶西涯有卜居宜興詩相州未得  
歸韓老汝穎猶堪塋長公 孫觀晉陵人宋大  
觀三年進士累官至尚書旣塋父於龜潭觀亦  
葬此龜潭詩歲歲來尋罨畫春看山弄水意常  
新不知流水今何處只有青山是故人  
王居

正建炎初自江都徙居時秦檜專權公在溫半  
年亟以疾請辭歸陽羨初正爲舉子時耻用王  
氏說旣第常著三經辨說 胡松年海州人紹  
興初奉祠居陽羨之言村築室曰橫山孫觀題  
波間指點見青紅雪脊嶒稜倚半空幻出生綃  
三四幅遊人渾作畫圖中 呂祖泰河南人寓  
居義興嘉泰元年進士論韓侂胄陳自強蘇師  
旦周均書出中外大駭杖決流欽州就逮不懼  
京尹受侂胄計誘之曰誰教汝共爲草者不答

曰汝病風喪心耶曰以我觀之今之附韓氏得  
美官者皆病風喪心也 蘇庠丹陽人幼爲清  
江引詞蘇文忠公見而竒之客居陽羨號後湖  
居士 慕容暉父唯良領常州刺史因家陽羨  
居有雙楠軒聳立如蓋與蘇文忠公遊目爲雙  
楠居士蘇子題雙楠軒南軒前頭兩佳水先生  
撫翫常不足尤愛薰風五月初白銀花開光照  
屋 汪藻鄱陽人壻於宜興莊氏愛溪山之勝  
因卜居焉 周必大江西人封益國公自號平

原老叟卜居宜興 夢得云陸希聲所隱君陽  
山今金沙寺其故宅建炎己酉春虜犯維陽余  
從大駕渡江夜相失小較自常州挽小舟授予  
教使入荆溪走長興夜抵湖湫因求宿金沙寺  
中夕不能寐起行寺外月色翳翳然因記希聲  
舊廬時予慕此山久矣望之若不可得今乃至  
此 徐賁吳興人過荆溪寓久之識周砥於顯  
親寺聽秋軒因定交後愛溪山之勝遂卜居蜀  
山 陳儒中嘉靖癸未進士累官侍郎兼管祭

酒性惡封殖視財若仇既謝祿家益貧乃徙居陽羨買田以給資足跡不及官府臨終見公臥

榻踈席破帷

右僑寓

史氏蔣弘謹妻幼寡誓不再

嫁誨子顯封慶國夫人初居馮湖窶甚育鵝自給朝縱去暮揭竿於岍則畢集焉蔣之竒有詩云凌風汎浪白於雲野放湖中曉至昏一舉招旗畢來集至今人號養鵝墩儲原善二女紅巾亂私誓同死賊猝至家衆相抱而溺後漉其尸葬之曰雙貞墳母姚氏常夢二女魂化爲鳩

每哭雙鳩集庭垂翅作悲泣狀陳氏王璉妻

璉死陳矢節時食鹹梅吐核於地祝曰妾有二

心此核隨朽否則尚幸萌蘖尋挺生一樹

右烈女

右余謁先君名宦祠自語溪歸見寶帶橋大圯

時俞觀察陪巡荆溪亟走告之因歷溪山名勝

虎見白岳旣歸畫寶帶橋圖上郡二守許

諱爾忠

申請憲檄下長吳吳江三邑僦工居亡何小圯

余與賢邑侯葉侍御

諱成章

捐貲助修橋成請觀

察記之觀察不有請諸父母記之諸父母不有



橋沉沉夜色如霜有巨艦沉於雪如玉之頽繇  
六橋穿湖心得月客曰和靖不云乎濃抹淡粧  
臨鏡臺諸人者都不掉頭只管傳杯譏之也余  
曰不然除却只管傳杯更有何事卽用四字傳  
三十五杯逕上柳州亭

右三

十五日渡江江頭競渡中流微鼓浪花予十八  
九時六渡錢塘先嚴自暨浦來崇暨浦父老哭  
聲亂江上之濤今祀於崇矣若耶蘋藻亦復不

絕

右四

過江雷電大作西興粧亭古跡西施嫁而粧也  
少憇汲六眼井水憶長洲江候遺先嚴手牘云  
西施美人生於諸暨嫁於長洲二百年來香魂  
當往來兩國間我二人皆以簿書失此良緣殊  
可尋味西興古西陵渡錢鏐王易之

右五

西興買渡水樹爭綠溪溪如畫樹縈以古藤凡

五里風雨欲來急登岳廟江濛濛不辨其南山  
霽處江迺出亘數百里產蓴絲似小荷翻雨絲  
絲軟美肌理甘膩齒頰間作寒潭助以薑桂使  
冷烈攪以甜蜜兒女情濃產不踰境味不踰宿  
或爲語曰西施已嫁之花也蓴菜未嫁之菜也  
莊亭六眼井通湘湖雨中過蕭山二浮屠有鶴  
鳴其上

右六

從枕席過山水陶堰平遠逸曠而金簡玉字遙

付宛委山一夢昔人云不見蘭亭胸中猶有蘭  
亭則余未至山陰時胸中已饒右軍數脚本矣

右七

高橋古木一本五大幹倒臥橋側入嚴村四山  
圍抱山窮水盡忽山忽水忽山而又山水而又  
水不知何道出何道止

右八

是日午睡甚酣夢延一相識劉君及予出迓又  
疑非是方巾紫袍握予手登樓樓懸青織圖圖

之下盈數十軸異卉燦目與客談罷已到曹娥江口謁娥果一樓乍見額扁劉似夢及閱誠意劉青田碑記乃悟扁額之劉余年家尊行而青田先生之文應青織云山茶花垂數百年根如竒峯居人云有折取一花者其手自懸于樹勒石識戒兩廡畫娥相四十二幅悉如夢孝女泉最冽

右九

曹娥江以孝女名慈谿縣以董孝子黜名余讀

漢娥碑及漢旌孝二詔如見古人以孝子故慈其母兼慈其邑漢家宏遠夫孝子勤汲於遠樂母嗜泉隣母以規其子隣子忿毆死董母孝子初引刀斬之嘆曰豈有無母之子哉仇母阡死又引刀斬之則曰子不竟服親之喪猶無子也又三年始加刃自伏法原其罪孝則孝矣母旣死矣故謚其邑以慈不以孝憐孝子也白孝子也孰若娥與父長枕江心劬勞寤歌乘濤下上也歟哉

右十

據壁上圖曹父以端節戲潮死孝女年十四先割股聞矣初擲衣於江叩屍所泊抱父浮於江面岸旁晒之娥復投父於江負而起明有禮也娥既死沿江盤旋再逆流而上其屍屍猶負元選姬嬪一姬禱於祠孝女爲改其容姬得幸予封

右十一

娥江手可招而渡山甚逼過梁湖予自錢塘渡

西興宦於浙者主家巧抽豐梁湖不聞有此

右十二

四更過上虞壩枕上乍聞鑼聲舉纜舟動漸浮船底微吼吼不已如怒虎如悲驥人語雜竹索

右十三

曉過姚江中壩則立於岸水懸壩丈雙建表而削其石挽者以索繫船尾三掉而首昂甫上石與木戛木與舟戛底平首尾皆躍首止而尾三掉長年雌伏遽從伏起持篙急下舟勢搖山疾

行如矢

右十四

浙東船圓爲覆方爲載余名曰混沌若無伏羲  
一畫太極幾乎悶死推蓬展視義畫儼然四過  
壩乃知混沌船之妙

右十五

姚江舊城倚龍泉山宋高宗幸而美其泉行一  
日水寬平山委蛇波瀾宏濶四壩從下而上近  
城九里謁宋石將軍廟將軍旗翼楊沂中破虜  
暨贊我文皇帝親征沙漠吏茲土者有白馬  
浮水錢清湧潮之異樟樹可數抱

右十六

舟泊天寧寺步寧波府前見太守一童生告示  
大妙據呈一卷也而或稱姚以忠或稱姚以孝  
忠孝豈能兩全某縣童生其出鬼入神乎不覺  
失笑

右十七

步月湖微雨呼小舟上四明驛樓烟樹滿湖湖

長四沙夾竹爲墻多置樓上可琴書下可舟楫  
此墅彼祠賀知章一椽仍奉香火湖可乞歛登  
延慶壽昌天封三寺延慶寺後入永巷忽有池  
池後觀堂堂後方丈寂無人聲天封塔上定海  
招寶如几案乃從日湖歸

右十八

夜將爲奉化之行余自入浙東評山水紹興關  
鎖姚江平遠鄞奉化瑰瑋錯繡如絳霄天半起  
伏萬重張帆趁潮尤愛風棚壩坊橋溫台孔道

蓋樓二十二間山四遶漁父立橋柱迎潮布網  
右十九

宿沈家村雪竇茶笋佳次晨駕小艇二十里觀  
金鍾塔岳林寺栢岳林晉佛涅槃地示寂柩已  
在封山以袈裟乞居土地布裟六十畝居士曰  
某瑩域在此乃爲割裟一片化身入閩晉天福  
寄書莆田令遺岳林寺僧自題曰彌勒真彌勒  
化身千萬億是時現時人時人俱不識復自跋  
云卽此是真不得更狀吾相然後知其彌勒也

塋於殿中永樂現形稱奉化縣布袋和尚鑄像  
送山始見水碓

右二十

途遇一人執余裾問云公何地上任曰非官也  
看命麼曰不會然則何來曰看山水其人呵呵  
曰這是一位堪輿先生了

右二十一

坐封山活佛道佛一僧云鴈蕩山石屏有龍鼻  
一羅漢題詩以筆蘸鼻之一孔曰一筆點乾龍  
鼻水方覓句俄見石屏裂開卽續曰等閒題破  
石屏風今龍止一鼻滴水愛其言記之

右二十二

余在梁湖見主人質朴曰抽豐其少衰矣及到  
奉化問主人安在渠夫人與令郎同聲荅云臨  
海縣打抽豐去了

右二十三

立王尚書鈔牌下憶

世宗朝天下清官王鈔石簡忽晤其孫偕登官

山謁建文死節戴探花宗彛祠噫奉化臨海鈴  
鐸相聞方正學手可招戴公

右二十四

海味江瑤柱第一出奉化惟清明時有之大蚌  
尖口其肉可鮮食次青鯽若寧波以來蛋徒即  
魚鮮鱸鮮淡菜摻魚墨魚皆美時正盛

右二十五

自奉化登陸至臨海三嶺初桑隍嶺坦過嶺繼  
珊虛嶺少峻嶺下海濱二石曰石孔山海之尾

也面象山遙見漁人立海沙中布網海山晴霽  
波爲不揚忽山高烟起乃峰頭火燃航炭於海  
塔珠嶺額曰台東第一關四山陡絕奔如萬馬  
下分田畛宛然深隍山鵲野蒲風飄異香

右二十六

所過其溪橋十二寶橋皆勝入臨海有義井題  
曰十族芳名隨正學千秋義骨聚重泉乃方正  
學八百七十二義士瘞骨處也

右二十七

過江以來男子勤而女子不出闔地無遺利人無遺力山頭亦種芋老僧亦荷鋤越是以多君子也

右二十八

路逢一客云世間事無全美北方坑厠少生祠多此中坑厠多生祠少此言有關吏治記之輿夫問余云科場文字如何做予曰有題目就做文章輿人曰若要文章字字在題目內真苦殺人了此言有關作文并記之

右二十九

曉由西門禮正學先生祠

左祠五人

以文學余保孤

一以進士育孤二以寧縣尉藏孤者一以浙僉憲放孤遇難者一右祠四人同時同里死難諸君子也龍山舊祠先生移而之城

右三十

出城有古岫嶺自午炊後入松門關渾如隔世事略記得梁隆山雄奇望葛僊翁學士坪煉丹井竈其下子孫居者萬計派衍四十猶沿晉代

衣冠山澗颺至處水堆八九

右三十一

過江晴旋雨紹興雨鄞江雨奉化雨皆以舟繇  
奉化抵崇法寺五嶺三過嶺而微雨就宿越明  
日謁正學先生山雨欲來強止微風又晴

右三十二

初登松門嶺倒翻澗水白如雪聲如雷一峯起  
一峯折一峯委蛇邪抱一峯欲落不落一峯驟  
來海上躍半空步行五里如擁翠屏百里之內

擁玉京肘腋間遇隘石爲關飛鳥不窺俄焉緝  
碧散爲村落題曰愛山真堪愛頂種竹萬竿新  
矗龍孫皆雄老不可逼視路多虎跡遇斤竹嶺  
老僧真源坐關余曰此謝康樂所游地也老僧  
不識一字曰這謝康樂就是老先生姓名否山  
頂有墓有田牛羊下來千仞之嶺爲畝爲澮嗟  
乎越之勤也獨苦竹山而已哉

右三十三

由斤竹嶺而下爲湧溪輿人云前有崇法寺臨

海天台乘傳至者多就館苦刈草秣馬詰朝徑去或竊其什物當事者特未之聞耳

右三十四

由湧溪上輿人競傳一里卽崇法寺余行半里絕無所見則指亂山頭樹木曰此卽寺矣本從深寺叢中左山圍蔽三折而上始牆牆之內寺寺而經堂而左樓居然一布金地初澗逕下乃砌而西出接竹灌田一聲清磬滿地香草池有四季竹又其上爲大樓溪云

右三十五

莫上天台路兩腳酸如醋村語也余不然山有葛公妙僊菓也松門嶺有執雉以市者湧溪酒亦不惡過嶺數里路皆精砌

右三十六

崇法寺而下岡巒隱伏澗流三十餘里其巨者爲大樓溪時見山頭飛瀑數百丈或寂無聲或戛戛不已慧明寺在焉抵縣將二十里平疇廣衍至永清橋沿清溪市有筏以道府駐霞莊樓

正對赤城山呼酒與落霞共醉時三月十三日  
初入天台路也

右三十七

次日步妙山山在邑之東祀張睢陽西峙學之  
文峯或日色橫列街巷三段如乾卦像

右三十八

雨中在霞莊樓一無事事雜取游覽之所得者  
記之

虞淳熙序方外志雲雨慈味笙簧道聲虎落時  
開鹿柴不守笑司馬過橋之悔嗤阮客還家之  
悲

屠隆序釋氏教宗自智者大師傳四明尊者爲  
教觀禪宗自雪居韶國師授永明禪師爲宗門  
五百應真化方廣寺彌陀一化現國清爲豐干  
文殊普賢嗣化現一爲寒山拾得一爲戒闍黎  
周七娘仙宗帝命周靈王太子晉王桐栢宮後  
劉晨阮肇採藥遇仙唐司馬子微隱此山受度  
黃詹公宋張紫陽真人闡悟真之旨王逸少許

玄度輩從剡溪入此山采真焉  
無盡序東晉曇猷棲神蕭梁定光顯主暨陳隋  
智者立宗命教海內以爲指南  
山頂對三辰當牛女分野上應三台西域記亦  
云震旦天台石橋方廣寺五百羅漢居焉華嚴  
云東南方有處名支提山有菩薩石天冠與諸  
菩薩眷屬一千人常住其中支提卽塔惟東南  
方有赤城其形如塔巔又有舍利寶塔卽赤城  
爲天冠住處

自荊州南岳東至庾嶺北繞匡廬南盡羅浮中  
則甌越抵武夷常山又爲水所分溪左浙西溪  
右浙東過爛柯太末至括蒼起頂南支仙都石  
門玉甌鴈蕩海門抱於台之東南北支金華屏  
峙於台之北正東一支至大盆山一化爲玉山  
一化爲天台玉山又爲兩支北支衍爲會稽秦  
望蓋自九里坑發源至嵎縣出曹江東支過關  
嶺復結爲天台若天姥有石城胚胎自萬年藤  
公嶺發脈已爲仙人浪黃杜溪截住是天台西

北幹也關嶺過脉處北以黃杜南以左溪界水  
極分明台山峻拔如海中巨浪陡然一躍纖悉  
頓足前後結爲九大峯每升其嶺皆可數十里  
如在平地山無背向四面如一山有八支八溪  
爲界以華頂爲車軸山周遭如八重輪亦如八  
葉覆蓮

赤城其南標石城其西固東蒼其脊四明其目  
骨肉不偏形神俱妙

南門一支取華頂直道以南魯溪爲界自赤城

山 國清寺 金地道中 金地嶺 定光菴

真覺寺 佛隴大慈寺 太平寺 寒風關

長壽寺 文殊寺 西竺寺 察嶺

南門二支取華頂迂路以螺溪爲界 清心寺

傳教寺 螺溪道中 幽溪嶺 高明寺 清

涼寺址 螺螭潭 黃潭菴 聖蹟内外菴

東門一支取華頂直道槎溪爲界 慧明寺

槎溪道中 顧歡隱處 天封寺

東門二支取華頂仄徑以水溪爲界 王春山

斤竹嶺菴 彌陀菴 仰天湖道中

北門一支取華頂峻路以羅木溪為界 澄深

寺 摘星嶺 大同寺

北門二支取華頂險以福溪為界 金庭觀

福溪觀道中 慈聖寺 石梁橋 斷橋

西門一支取華頂迂路以開溪為界 青浜

布水 玉女溪 瀑布寺 福勝觀 桐栢宮

瓊臺 雙闕 護國寺 桃源

西門二左支以黃杜溪為界 石城山 石佛

劉阮村 司馬海橋 金墅嶺 彩烟山 天

姥山 石梁道 僊人浪 應心泉

西門二右支以秀溪為界 關嶺 白巖山

秀浜口 龍湫瀑布

西門二支直取華頂 萬年寺 鐵船湖 羅

漢嶺 通玄峯 香爐峯 華頂寺 華頂峯

二岐路一至會聖由小路上藤公嶺與萬年會  
一至萬年過道人坑先往石梁至察嶺頭會

徐大受賦張無夢結菴雙闕云大壑之心瓊臺

突起嵐光破綠狀如削瓜 石梁現光現花佛

隴見橋見嶺 東橫山台山之脚有新婦巖下  
有石鴨相傳水打石鴨頭此地出公侯 九峯  
山在瀑布寺前羲之與支遁遊焉 蒼山鳴海  
山吼必大雨 寒山子蛻於寒巖梵僧拾其骨  
曰吾拾文殊舍利也龍鬚洞巖竇間散若虬髯  
明巖寒山詩重巖我卜居鳥道絕人跡 竇  
峯山產花乳石李德裕詩聞君采奇石驚斷赤  
城霞宋林逋謝天台僧寄石詩斷石自何評枕  
之懷赤城 華頂峯周一百里夏有積雪 蒸

餅峯在石梁北僧曇猷訪方廣寺有石如屏號  
蒸餅 天台本東海島嶼獅子岩下有竅日初  
出光入隙中謂之日窓 翠屏岩山勢中立如  
案兩端畧起似展誥軸名展誥屏 石筍岩在  
螺螄潭上根入潭數十丈尖如笏如紫籜之將  
解 關嶺宋令鄭至道去任邑人至此不忍捨  
因留家焉羅漢嶺有巨杉大百圍凡供五百大  
士集此嶺 赤城玉京洞許邁嘗居此與王羲  
之書自天台山至臨海多金臺玉寶仙人芝草

其下有洞二百里魏真人所治吾宋暨唐天寶  
嘗以日中星鳥望秩此山宋咸平天聖中屢投  
金龍玉簡 宋景祐中僧明照見劉阮洞口金  
橋跨水有二女戲水山元祐鄭令至邑夾岸植  
桃數百本構亭浮杯 蓋竹洞宋憲使何備夢  
遊其中訪之不得 聖績石一石如僧履一石  
如僧袂 五百羅漢泛海至此船與物皆化爲  
石有覆船山 雷馬山有潭以縵懸挽至山半  
又挽而下方到潭測 黃壇潭智者放螺處今

巨螺浮於潭之石筍每鳴吼有大風雨 船湖  
在羅漢嶺下以水寒不花 昭慶院三井唐宋  
嘗遣使投金龍白壁一井觸於尼而塞 曇猷  
洗腸處井邊生青韭仙人井飛流噴沫俱在赤  
城上 應心泉在萬年寺泉爲賀允中出允中  
自記 放生池陳大建十年智者置亘百餘里  
勅禁採捕紹興置放生池縣前五顯廟前有石  
碑 金錢池在赤城曇蘭誦經有神獻金錢僧  
棄之池中 就下爲田依崗爲地龍神窟宅風

雨無恒晴多則禾不秀雨多則稻少實故僧寺  
窘而僧德涼 大建七年智者初來宿石橋見  
三人阜幘縫衣老僧即定光曰禪師若欲造寺山  
下有皇太子寺基捨以仰給三國成一大勢力  
人能起此寺寺若成國即清後將滅時爲宮寺  
基畫或因囑書貽晉王晉王命司馬王弘依圖  
造寺創寺後冊東宮後煬帝以智瓌啓定光見  
夢於先師當呼爲國清寺後燬而重建柳公權  
書大中國清之寺天台佛三字建炎重新之詔

易教爲禪禪教互爭寺僧相擊 雨華亭萬工池  
遂廢 大慈寺所書虞世南華嚴經紹興中秦  
檜盜去 天封寺智者遇一老父告云師卜菴  
遇盤石可止遂結廬焉自號靈墟註涅槃經於  
此 萬年寺有親到堂取仁宗賜衣時如朕親  
到寺語 廣巖寺寺鑄鐘不就有老嫗施一錢  
投一錢冶中鐘成而錢宛然在焉曰貧婆鐘有  
懷容羅漢真身 高明寺智者講淨名經風忽  
飄去杖錫行五里經憇此寺稱淨明堂名翻經

寧國寺智遠結廬每誦經羣鶴翔空紫雲覆  
頂開巖寺梁普通三年異僧肇開此巖六瑞  
繽紛如雪賜額天花尊者開巖院金地庵梁  
大同初定光居之枯石數片爲招手石古語云  
定光金地遙招手智者江陵暗點頭宿佛菴  
在四顧坪佛樹僧居之張承粧五百像後有徒  
掘得白磁瓶一并磚刻心經題沙門佛樹祠  
栢宮永嘉元年征虜將軍沈約一千餘人棄官  
乞爲道士居之唐睿宗景雲二年勅爲承禎置

觀五色雲見禁封內四十里無得樵採五里不  
許遷葬醴泉愈疾道士徐靈府故居有黃雲覆  
其上福壽觀葛玄飛白書王右軍評其書如  
鳥鵲勢塞上有三井洩爲瀑布有濺珠亭引瀑  
布灌池塘刺史姚鵠建老君殿得玉簡上之刻  
曰海水竭台山闕皇家寶祚無休歇詔付史館  
宋天聖間遣中侍投金龍有布衣孟合附詩以  
進嘉泰二年令丁大榮立碑刻習養之瀑於石  
崖晉曇猷釋者興寧中至天台赤城有大

神屠之言輒出宗遇一嫗問途有投諸淵者飛  
錫救之水立涸名乾溪坐禪猛虎數十蹲前誦  
如故一虎獨睡以如意打虎頭問何不聽經皆  
去大蛇競出大十圍舉頭向猷半日乃去後一  
日神現形曰夏帝之子居此二千餘年今去寒  
石矣猷行石橋橋斷聞空中聲曰後十年自當  
來也乃憇一石室室中盡鳴屍猶平生義熙隱  
士褚世標見師不朽其後欲觀者輒雲霧蔽之  
梁定光姓許字靜照慧佛隴三十載迹晦道

明智者未至前二年預告山民曰大善智識當  
來相就宜種荳造醬編蒲爲蓆更起屋待之已  
坐滅凡三瘞龍骨涌出後置殿乃已 隋普明

禪師依智者國清講堂狹小欲廣之俄而荊州  
都督周季節施杉柱泛海而至章安在赤城忽  
見師身十餘丈高出林表 明淨禪師山饑乞

飯遇群虎張口閉目若有饑狀淨以匙抄飯內  
其口中 周七娘夜臥普濟橋下每與戒公同  
遊歌云笑殺愚癡漢營家無歇時四山若來後

妻子各分離與戒師同化口生蓮花有異僧歌  
戒師文殊周婆普賢隨肩搭背萬世應傳  
赤城國清狎虎如犬識其居數其齒僧謂余曰  
今智者經行虎必出矣敬合掌賀余曰好事不  
如無天王曹源二井泉色白而味冽問所謂堯  
率臺更好亭新羅園噩夢堂塔銘古竺樓大半  
蕩爲冷風嗟夫智者之於國清寺也以不見寺  
成瞑目爲恨而詔命司馬王弘依圖剏造今數  
經兵火舊觀未謝方其未至定光豫勅山民種

苴造醬編蒲以待之群盜見神仗而不入白塔  
因新剏而放光固有不滅者存今廢而爲古石  
門萬松徑止觀亭也其蹟可攷也垂成而復廢  
爲萬工池也其泉可瀦也瀦則雙澗滙而萬山  
之水不泄也垂廢而可枝梧可鼎革爲天王殿  
雨花亭也雙澗自螺溪源出龍湫過湫入放螺  
處有巨礪水溢二丈戛於橋面中峯如飛鳳七  
塔之上山闕一面積土成崗樹樹合抱雄楓臥  
於道路最奇者菩提印月謾謾長松鳴澗旁雙

松叅天鱗甲飛動 大松枝如天龍之伸臂墨  
雲亂溪又一松方作虎蹲勢忽馳附道旁而上  
其枝空中如舞蛺垂百智者示現乎

象山龍射盲其一目龍怒而覆舟 招寶山氣  
象宏濶國初守海不於象山而於定海 象山  
似笳其海由寧波台州而環旋 高高翠微裡  
遙見石梁橫蓋從新昌路入也不知者以爲謬  
石笋有一峯每一重土外一重石溪中屹立  
樵徑三十

六盤皆用木渡 笋峯似小五泄一級一泄  
天台可圖鴈蕩不可圖 天台唐詩多未入刻  
者 山多藍鵲 金地嶺因霧重不見 龍湫  
瀑甚長 華頂望諸山如海各溪不減長江  
山如人面要取活意 看黃巖江流甚曲 寒  
山拾得開山智者中興 山中竝不見有山人  
來 石碓臥松在國清瀑布下 啗蔗嶺竟至  
縣 國清下兩山分一澗中流行數里過一橋  
澗乃在左 蓴菜不宜用鹽鹽則消其脂 瓊

臺下二三里甚妙



游馬鞍山記

子建怨詩願爲東北風吹我入君懷齊澣有將  
心流影之句白也愁心遣寄夜郎嗟乎自古丈  
夫不得意空教風月一番忙癸丑春旣出長安  
門雨桃花微酡霽山蒼然漠漠平沙暮烟欲直  
距蘆溝橋五里慈雲庄老衲舉手招雨就宿月  
出空庭踏月三更雨寂歷和長樂鐘吹殘夢晨  
屏奚奴戒裝四十里外予與家仲款段行烟巒  
襍曉吹遠峯如抹所至里爲築截石代瓦鱗十

五里綠楊垂曳鄉心搖落坐酒家胡孔道良鄉  
車馳轂擊間行小山夾路又五里至馬鞍山嶺  
陡絕樹禠崖傾蔽日虧月憇永壽禪林疊嶂前  
屏蜿蜒其右出盤磴青苔古色山果自落憊掖  
行逢歌者歌易水不許彈狹不許操燕趙女箏  
瑟則浮白客恠之余曰兒女真英雄偽戒壇峙  
殿左詢故故歲選律僧傳戒飭法詔革四月八  
日觀乎不女只且不士禿僧敗妓宣淫無憚猶  
出少府錢謗法宜誅壇面山雙浮屠障之僅掌

其內天龍人鬼森侍明燈異香遠從諸番出娑  
娑松下千霄交枝類偃蓋燕都異松三報國寺  
高才勝人生綺谷家馬鞍秀岩阿潭拓寺老禪  
揮塵品松潭拓最左磴躋千佛閣松梢盤玉露  
禁城春色杳靄間二之日重游西山來青山似  
萬馬西來顧其奔騰欲盡雖饒秀色不堪遠味  
此中使我作關塞極天想崇山峻嶺相去寸數  
茸翳類焦山隆半之圍三之樹十之鳥百之

焦山多聞

鶯其下幻上人安禪處

正統人一名鶯頭禪師

飯祇垣精

舍罷出其藏衣鉢項已亥飭尚衣司視謹疲馬  
山行愁日晚足下有白雲已覆屐其巔則里數  
以七靈洞以八紘宇靜室間決策往抵上十方  
禪寺石瑩而黝眺遠山數百里陟觀音洞洞口  
維摩半室扃有茅數束亦無鳥雀糧隘遇樵僧  
數輩勞乎曰槎枿數樹石田半區饑飡野蕨飽  
臥白雲賓送日月於林菁之中老此足矣遠望  
一僧棲樹頂剪香芽俄下揖予入化陽洞紫藤  
壽百年鐘鼓不鳴老僧龍鐘臥持炬洞右入始  
石級漸土高下深百丈上視沒其頂下視滅其  
屨岸巾袂袒裙鞞從事二里龍躍而出指爪鱗  
甲奮有魚揚鬣巨浪中一獅趺而仰其膝欲吼  
視之石分子布筭黑白道曰仙人杵有峯四垂  
去地尺昂其首則覲低其膝則黏與齟寧黏曰  
倒蓮石入小天門壁如漆夏淋曰濺珠石再僂  
至大天門廣袤古佛危坐瞻禮而出有天穴池  
深洞陰沍乳滴地爲石歷亂峯大噪始揖衣下  
不敢仰視忽凌霄漢虚空選擇成觸如來若來

若去若坐若臥洞容萬人或曰龐涓洞無考然  
兩山之間夾成蹊車不方軌古馬陵道云朝陽  
諸洞居嶺孫武子洞山之半化陽洞最勝

游潭柘寺記

出化陽洞之夕客憊余曰山者人之骨奇者山  
之骨招隱記云不如叔父大廳肉人耳好山明  
媚可枕可漱肉山耳躡雲根而人骨聽虎嘯而  
山骨客奮循修嶺下衍爲平原俄高阜歷阜峯  
出沒如指十里馬鞍山金碧背射歷歷數松梢  
不聞人語響迷往一遠山牛羊下來詢童子臥  
牛背荅五里惟有麇麇跡黃犬導之前森壁爭  
霞孤峯限日二里守塚戶兩三家手指尋昧昧

雉飛者三鵲巢於石蘿徑野兔橫軼十里落日  
坐啣四山欲暝俄衢闢長楊夾道青松間五里  
定國公域兆小橋流水四達家人出逢老嫗曰  
東雨作二里余仲偕客不知所之路石石磻騎  
步夾雨益注鬼火不青三里瀑訝何道出能烟  
突半里至頽廟道士臥強起曰前三里敗屋鱗  
喜得寺狂呼隙入古屋竄松鼠閒無人驚悅見  
道上持挺下曰我家平原村一里三古幢迎馬  
首泗水蛇行躡起躡始寺泉益迅由香積厨浸

畝齠滙池沼如沫如珠如搖珮如鼓瑟如風擊  
竹雨淋花月皎皎諸琳宮閉山杪墻如帶僧迂  
日豹來夜非挺不行趨入鍵顧余仲後忽嘯岩  
谷延之入復鍵坐大樹下月無纖翳濯鳧冰壺  
芍藥葢幽卉襟左植櫻桃歲進因憶漢明時宴  
羣臣大官進含桃盛以赤瑛月下同色皆笑空  
盤此景依稀似飯寂公房以山花膳問寺何年  
曰寺五百載而幽州始禹貢去都雉西北七十  
里山故海眼壤空柘柘老潭枯始龍穴大殿中

華嚴師退之二舍兩巨角躩而出寺困水迂龍  
入嶺水從嶺下山主定國公域產狼豹牛馬不  
得畜故築城障之猶獲初額嘉福改潭柘龍泉  
尋改大萬壽寺詳大定間蔡居士楊節度記晉  
梁唐宋代有佛日廣慧雪澗無初諸比丘而從  
實廣惠善誨通理益光顯之元至正間雪澗賜  
御酒皇姊公主致膳東宮命談禪禮數異  
聖朝太宗遇姚少師處

英宗詔廣惠戒壇遊跡罕遼金元皈依最泉瀑  
溪寒枕簟晨觀兩巨角峙殿之巔長及腹倍獸  
蹲踞欲躍爪揚吻張出其鱗之而眼抉其匪色  
似鳴累朝模範不就吻不張鱗不出眼不抉其  
匪色似不鳴不蹲不踞四壁藻以水墨蕉竹坐  
華嚴師騎老龍陰霧霖霖起溟泮生虛壁庭松  
摩霄一枝倒挂左殿陰榻上蝌蚪古碑一道磨  
薛讀之云從顯宗皇帝幸潭柘龍泉寺奉旨作  
頌臣僧重玉進曰一林黃葉萬山秋鸞仗叅陪  
結勝遊恠石爛編蹲玉虎老松蟠屈臥蒼虬俯

臨絕壑安禪邃迅落危崖瀉瀑流可笑紅塵奔走者幾人於此暫心休明昌五年記餘不勝錄有元至正八年碑紋如霞扣之鐘信州葛天麟記履巉爲三聖殿唐鑄石彌佛最古黃連樹跨兩石坐根菌露寂公採而啜予曰代柘折而左磴禮白衣大士殿經藏週如棹檝藻而鱗之胡元父子姑婦侍青蓮座下右靜宇滇僧居之左峻探泉根負勢競上互相軒邈泉水激石泠泠作響余最愛碧雲泉泉道坦四三折此峭下波

皺石矗數百折天穴云墻外有僧結洞茅異獸襍處出山尾山導走良鄉山形隘伏蘆溝橋一帶窅然別有天地余屏奚奴夜入狼豹叢中遊僅兩日計而再月則四之四陰晴則六之余骨山山亦骨余肉相者退矣在白衣殿中見雙履跡匣而襲之曰妙嚴公主膝有序而贊之者序曰夫差遵父命而亡越勾踐嘗胆而亡吳伍員之離楚國申包胥之哭秦庭皆苦心志勞筋骨絕歲月忘寒暑而後願有所克今睹此跡逆想

其來以有情之踵磨無情之磚磚穿跡成雙足  
宛然使人見之不覺身毛俱豎意慘情悽則四  
子心力所積視此足力淺深寧有優劣哉贊云  
以踵摩磚磚漸易磚易精進猶未止磚穿大地  
承足底地穿有時人不見我獨了了無所疑因  
之耿耿生悲泣嗟乎吾悲其意而錄之胡女子  
有骨哉

### 遊嶧山記

踰鄒縣城二十五里爲一家店距十里嶧可間  
道登日之夕矣亂暮雲而入里長者云道隘崦  
嵒宿晨初日分陟彼土祖中斷若門闕土人呼  
紀王城漢志山下故鄒城邾遷嶧依山爲邑紀  
在東海贛榆蓋春秋紀國何居然嶺有紀王墳  
下有紀王礪憇彌陀寺左觀風亭當門古幹鱗  
張鬣舞揖魚龍鳧蒙連青瑯邪諸山東吸海其  
北延月臺右一石鏡而立衲雲菴罩其上庭二

碣大書郝嶧書門三代地理書始皇乘羊車命  
李斯刻石曰書門蓋嶧居太山瑯琊會稽間問  
所立石宋元祐移置鄒學宮奚居玉海齊乘晉  
永嘉亂建興元年中書侍郎郝鑒徙鄉曲于家  
瑯琊王睿以鑒爲兗州刺史山南大峯名郝公  
嶧云左周邾文公祠茅成子配茅成子者主益  
見執以束帛乘韋請抹于吳不泯其社稷文公  
一言恤民祀之義飲彌陀菴大都岱宗海上來  
涉長河結爲峯左帶顓臾之東蒙遠山數百里

秀出千芙蓉太山西南至是而盡六山魚貫從  
泉流數十道如一浮漚窮盡瀛渤環山皆洞洞  
挾風雨負紅日上七里輿十里步步肩人足而  
躋下五里步三里蹀二里緣石髮髮竭行鳥背  
輕翠微者曰山遠翠近則微石而面目之介胃  
之匝盤之門闕之止其奇以躡以攫以噬以冠  
飾以披鏡以蹲舞以兒孫以徒妾止洞而乳之  
鐘之穴之池之廡之止又其奇以奕以吟以嘯  
止峯起伏肺腑在中竅穴居外止又其奇如琉

璃籠眼如如來屈指爲光明拳兒女囁嚅語止  
余所見嶧山小者星墜大者雲奔墜者上奔者  
臥懸崖石覆似鈴中舌其二砥其八垂霄漢下  
去地淵層疊上去天咫尺天半石竅尺路半以寸  
石虢中長緋桃蘭草合抱之木遠不見稍顧從  
石底數其根如噉虚空石崩路絕以手指月亡  
失月輪亦亡其指佗異屈伏舌吐不下將巔余  
憶郭公山晚眺金鰲珠闕鷓鴣咽暮嘲以水國  
勝之及登望海石東海一杯水落霞欲醉觀止

矣是日飯罷游盤龍洞三折肱入有泉貯水升  
僧爨不涸如器中鏗聲出于外音韵倫次三石  
夾一石懸之爲鐘豐下銳上無蠡奇篆下垂至  
絕鐘前臥石疑魚龍聽法如是天人圓光成音  
披音露妙折而上飛雲洞峙天門試劍兩石下  
洞瑩徹日射綠樹交影出由山東面折而南又  
西旋之有亭坐泉足下流一石可枰至大通巖  
朱櫺洞曰真儒境祀孔子蓋崑崙之東爲岱岱  
南爲嶧二山之間秀所鍾云嶧陽孤桐見禹貢

入孤桐寺予聞桐枯復生

萬曆十六年桐生枝

其右孤桐

榭半幹大石屏之書嶧陽孤桐訪金仙洞泉曰  
井泉或云桐可合抱一幹挺上丈一大枝橫直  
贅于枝上者三高三尺丙戌存萬題後老道士  
曰山靈忌名將隱矣無幾而桐枯或云孤桐者  
孤生之桐非孤樹也孤生朝陽四無陰翳故名  
及登險腰半足試劍戟翼舉則胸鳴背負則色  
土邪覷則驪龍俛而窺吾足步片石橋一線孤  
懸躋止輦過橋石跨隱仙洞洞壑登一鑑亭池

曰龍池一石跨水長蒲蓮蘋藻青島飛踏石障  
亭之三池映其一面從小隄曲沼入觀音菴俯  
視一鑑亭影零亂池中瑟瑟如夜壑急雨菴之  
北石菑昔亦曰蓮花池數里歷覽扼險處如追  
如奔至青華宮西三里仙人宮呼吸之氣通帝  
座西仙人洞元時仙者居之然余覽洞中斷石  
有元祐七年像紹聖四年帖云洞廣二十丈形  
覆釜背一峯如丹鼎洞負鼎而開鼎上有九峯  
峯頂彈丸元明真大師通天大師安然子夷真

通教大師遠塵子皆礪青華宮之巔爲冠子石  
望大風口冠子在其足矣三里泉喧夕照亂峯  
明滅雲駛月運舟行岍移爲撞爲刺爲射爲括  
如風吹光如刀斷水梵唄吽歌自然敷奏從白  
雲宮來十五里而響徹林木池沼皆演法音余  
臥梅樹下如聲度垣了無所礙俄有挾予袖上  
白雲宮者由掬龍洞坐來鶴菴渺渺平烟俛視  
羣峯落星不可數沉日欲低猶在千巖上五華  
峯懸而瞰西峯平而揖之躡石級禮玉皇昔遠

塵子潛修于斯東遊海上見帝像自海浮出及  
還像端然洞中異而祀之結茅爲居其中自雞  
犬飯聖水井在宮左自洞出宮有雙松倒挂一  
枝仙人伸其左肘右道藏閣下遠塵子押記書  
延祐十年泉曰冽泉素湍淥潭迴清倒影出坐  
遠塵子白日飛昇臺面獨山河東襟海三子峯  
峙雲霞山半稠畧見近山峯頂田疇如薺石八  
二老坐六子立曰八卦石山中有雲不絕數十  
里羽士家雲中余所歷老君礪大青巖小青巖

五老石東倉口西倉口皆異循五花峯道石竅  
尺犢鼻委蛇攀輿夫足握草根登五花懸崖如  
砥石覆其上尺瓦承之左望海石蜃氣千丈騰  
躍欲上右紀子墓桐陰布結清露晨流撫葉動  
操衆山皆響去白雲宮里許云下南天門雄勁  
而隘石高三十丈廣半之披剝萬象一山咽喉  
云臥虎石踞門外可坐泗上十二候蘚食字以  
草攻之錐畫出有石如鼓將士冑鼓欲鳴雲騰  
鳥飛風動塵起林無靜樹妖精洞壁篆文殊自

佛言一石雲湧駭浪三青魚鼓鬢噴妖霧下臭  
皮礪或曰神僧解其皮處始陟輿步半舒眺及  
下足刺刺進則謀人僕痛退則謀馬馬瘖所過  
石曰龍靈曰鶯嘴曰門曰猴精曰滑角曰靈巖  
侯曰虎皮石曰書洞其可封秩者以百不以封  
李杜王詩壇顏山上奇石上官儀居仙人宮宋  
沈輩擬詩紙片片下一奇也石坐五千人者十  
坐萬人五歷碧桃菴南華觀徐八寨二郎宮透  
丹峪燭陰臺蔴楷苑嘗聞嶧有樓觀七十二然

如書門邠嶧者已化為飛塵蕩為冷風矣日下  
春榴花交路入紀王礪老僧曰王修行處出山  
土岡綿亘邑人曰紀王城而博聞者以為譌凌  
高諸亭題詩惜不盡記東方巨鎮宗岱宗羣山  
列岫臣妾同西南特起一巨峯却立不屈如英  
雄趙孟頫曉臨四顧青天近暮眺千峯紫氣含魯王  
仙人樓觀七十二濯纓尚有當時泉始皇羊車  
去不返書門題石空宛然賈二魯郊空且曠目  
力不可窮倏見千仞青橫截乎其東羣峯相後

先蹲踞如兒童

吳寬

茲山何萃萃秀色參青天紆

迴帶洙泗淮徐挺其前

徐源

筆萃峯巒切帝居石

門遐眺見青徐琅玕拔地千尋起菡萏籠烟百

色舒平野遙連邾子國荒苔誰辨客卿書名山

不少遊人跡若個登臨是歲除

葉向高

河勢遙分

雙白練山形近作九青蓮

又

滄浪如衣帶半挂

青巖色

又

落星不到地累丸不到天玄圃亦已

幽羣玉亦已顛金華牧兒何畹巒一入紫壇無

何有

又

深林已盡鳥不鳴攀緣猶訪白雲近

于慎

行 狐狸穴 姬壠 獺身悲 中落湛若水 花開絕 巖芬

愈遠 沼出層崖地 自偏錢達道 石上已無秦相字

巖前獨有魯儒祠顏廷築 萬轉千迴路 忽迷盤蛇

一徑誰能造李化龍 大地烟霞三觀接 長淮風雨

二陵來黃克纘 山勢雙蓮峙 河流一酒杯朱長春 連

雲迷漢渚到海避 秦鞭又 懸崖虬磴折 出壑鳥

聲迴李長春 停雲曉 鳧亂別澗 飲虹留張鶴鳴 斷石

豐蘚迷小篆 層崖浴霧瑣 孤桐胡繼先 萬壑響 蒼松

濤飛流掛巖谷又 紅退火龍甲 綠明翠羽翰傅新

德 孤桐搖落霜 林白靈液喧 雁夕照 紅畢懋樹

老雲為屋 山深酒是霞梁州彥 琴成半死 孤桐樹

碑滅全消 小篆文成伯龍 石花帶雨 青初密 巖樹

凝烟色欲霞又 人自山腰尋 洞入僧從巖底結

茅居又 絕頂石崩如斷路 半巖雲起忽成峯謝肇

湖 邃洞有天通 巨壑豁崖無地敞 危臺巖 亂石

壘來空世界 孤桐枯去鳳來無王允翰 天接山光

碧石妨洞影 孤幾點羣山小 千巖落日低潘榛 一

泓聖水隨緣酌 萬劫神光不住心劉堦 惟餘千載

心散作山間雨

題紀王祠前人

石落不落懸崖鍾孤亭

孤軍千秋桐

蘇惟霖

在臥虎石磨崖上字峯回瞻

鳥道徒倚上天門榆莢漫前浦桃花迷仙源決

去杳獨嘯環海見危垣暫喜離塵想焚茗○○

○蝕三字

靈跡遺往代耆舊○春情雨霽浮雲斂

風和芳草生探奇經虎窟攬勝聽龍鳴欲覓飛

昇處海空落日陰絕壑盤空曲鷲峯白日危鳥

飛雲影亂鍾靜柳烟垂紅霧隱蒼莽古苔沒斷

碑堪輿頻入望○是爲貪奇嘉靖壬寅閏中劉

鳳池八卦石上勝國碣拭而歌之云玄風起兮

白雲飛玄風杳兮白雲歸山高兮地勝物換兮

人非不圖今日今金碧輝輝鶴流徜徉絕俗造

微納白雲而出岫無乃示吾橫氣之幾嶧多奇

篆不能讀遊以癸丑三月之廿有七日

西蹟訪梅記

由光福抵銅井逕穿西蹟居民嬾種梅而勤種  
桑然志稱香雪三十里或曰古梅花國長子孫  
而處不繫乎人也樹之亦生不樹之亦生在百  
萬梅花中語人曰少梅花處奇無梅花處奇老  
桑襍梅稍絕類矜嚴老婢哂梅花不如不如彼  
屈曲不挂牙頰間詞家之辱梅花甚矣花之至  
坎軻者夫以睡魔辱之以郵亭辱之以鹹鹵辱  
之以丹青辱之以筮篋辱之以絲桐辱之自來

人近梅花梅花偏不近人夫西山之士宜梅其  
人宜桑可以鄰矣藉西山之愛愛梅與桑等梅  
亦不芳然則三十里之梅卜不知已而處焉者  
矣泛鄧尉溪徑深曲素娥匿影樓閣半籠緣束  
崦至虎山橋水遶亂山兩峽一溪畫巒四匝遊  
人至此酣適欲狂予大笑吳儂俗甚是焉如銅  
坑橋此水淺而山逼彼湖靚而峰長亂西崦度  
青芝長堤浮映玉山作記者云如萬丈錦落花  
染成湖水作臙脂浪予大笑曰是焉如穹湯二

山桃花臥三萬頃蓋蟠螭種桃桃伐而梅盛兩  
山代之湖上花事一番除目也山之高出鄧尉  
者曰銅井亞銅井曰安山西接具區極北青霞  
亂抹遠可眺錫山九龍嶺頭萬株臨波隱見大  
都泛鄧尉銅井間水道十里偏宜掉槳深處隱  
約香葩模糊烟水中勿着醒眼銅井顧園寶珠  
山茶可合抱一樹五色割梅花片席居之乃司  
徒廟二古栢丈人行也余臥一樓晨起嶺上數  
株如霜行數里太湖出輕濤引風度萬玉隈凌

波爲熨斗柄嫣然欲語又二里湖光漸微荒村  
深塢處處飛花山窮水起漁鼓數聲疑花神擊  
浪西磧而梅疎度嶺復茂古亭老銅井宋黃金  
紫墓一里極饒老幹山蒼樹奇纔入董墳點染  
多穉氣極喜陸家塢卜築者玉峯禮初顧先生  
袖挾雲霞携手千篁同上一岡瓊積數里西蹟  
一帶杳然流水猶不減數千萬株奉慈菴在其  
偏余卜築讀書處泉曰壽岩背七寶疑一脉淳  
熙間寒潭徹公構樓養閒名紫雲以菴東南塢

有池晨出紫雲遶奉慈而去僧來復居之元季  
徐良夫招客其上稱養賢樓光福諸刹強半廢  
而奉慈興至玄墓竟無梅矣然西磧第一玄墓  
次之正須索解人耳巔有巨石李將軍以百夫  
出之其根抱可數畝莫窮其底有大枇杷二株  
寺僧未割愛耶踞石一望鄧尉法華障銅井青  
芝左游龍右洞庭諸山乍陷乍起湖波混茫水  
影交映蓋梅之勝三自懸崖而下自窪吟而上  
自扁舟橫波而上下最可哂者騷人之評宜輕

陰淡日空小橋曲澗空銅瓶紙帳夫物之待而  
妍者皆有所不足也梅豈有不足哉宿銅坑里  
有亡橋媪詈清徹亦堪雅部道途見園丁一示  
云爾家有花爾客爾圃引而折我我花何辜不  
覺啞然失笑噫余猶以清罵一場園丁一示爲  
不辱梅花也

湖橋訪桂記

初宿銅井湖橋居人謀泐石建橋余樂道其事  
以名吾記銅井山茶樹下追憶開時五色參差  
老桂方池環之因話陽羨洞壑此花類銅官杜  
鵬凡余游陽羨二十一洞各記夜走南岳侵於  
虎踉蹌返自然菴指七十二峯作七十二說鼠  
嚙之幾盡時時擬續曰恠遊鼠餘未暇也同遊  
者浮大白引余言隱屏書之故附記焉司徒祠  
柏下盤旋不能去其次玄墓石頭堪佇耳仕墟

有竹極佳花繁而葺醉眼模糊欲雨不雨鳳凰  
山花皆席地獅子插滿身花張牙掉吻以酒醉  
之獅子笑余亦笑獅子舞余亦舞獅子頭腦目  
鼻狼籍噴花不勝酒頽然立余亦不强顧青衣  
曰有酒乎山多名賢寢處其下亦有僑寓語漢  
鄧尉氏曰山以君名卓哉飲吾酒一杯語晉刺  
史都太玄曰君有仁政其葬也銜土之燕千慈  
哉飲吾酒一杯語唐太保陸象先曰君不附太  
平公主直哉飲吾酒一杯語陸甫里曰光福以

西土多石少君采樵焉幽哉飲吾酒一杯語宋  
隨緣居士黃金紫曰秘閣山林適哉飲吾酒一  
杯語顧景繁曰讀書五十年薦舉不出逸哉飲  
吾酒一杯語元隱士邵姚耿三氏曰篤學無嗣  
徐達左收塋之勤哉飲吾酒一杯語王尚書曰  
君死土木之難烈哉飲吾酒一杯尚有殘瀝山  
鬼欲來余戒勿與率恐皇而退是爲七之日先  
一日虎山橋下遇賣蝦翁赤鬚而十指毛呼與  
飲甚豪雨乍霽山如新沐橋上見牧牛老人背

無笛簫鼓賽神橋下過戲語之曰盍往乞乎曰  
腹已飽耳余曰汝牛幾何齒曰明年二月是牛  
週歲爲種秫待君賀矣余曰非不欲來恐傷飽  
耳是夜山水之態甚奇大都類此歸舟靈巖山  
下月色清佳客過而問曰桂何如予曰品不逮  
梅而功遠過之梅索解人耳敗骨糞土桂則馨  
之蓬頭老婢桂則嬌之垂邁龍陽桂則鮮之長  
年挽者桂則蒙之童僕林立桂則逞之肩輿負  
擔桂則載之此其功可勝道邪客曰有一二佳  
販花翁也

話乎曰傍舟太湖風傳其香不見一花湖倫之  
下有船一隻挽子一升蘿一斗一大斛一詢之

販花翁也

西湖月觀

甲寅居堯峯登妙高吸太湖手煮寶雲泉自龍  
洞下瑯玕夾流水侵予枕簟深夜鳥啼四更吐  
月游魚欲躍假寐未遑曉烟如抹風急雨來四  
山暝合泛石湖楞伽間十里嵐光天長水遠以  
此貪戀家山唯西湖舊游小草未削初夏日長  
簡付嗣氏嘗謂游山水如睡臥記述如作夢當  
其夢時好醜皆夢一經改竄情事倍佳無乃非  
昔夢耶旣編補帆爲拈月觀畱作湖上一夢

初四月紀

癸丑秋八月暮維舟棕毛塲步石函俄見湖光  
逕棹斷橋係叔一峯送影湖面紅衣落盡遠水  
一枝藕花泊妓依稀太守昔年西泠橋下問水  
雲寬窄落日銜山波波擁紅巒夾綠陰斜入外  
湖青蒼異狀騰焰短矣月午鈎草欲碧一半勾  
畱逆鑑上下極愛雷峯蒼立

初五月紀

自溜水橋觀慶忌塔昔要離誘入吳因風勢以

矛鈎其冠而刺之葬此咸淳間怪物浮水若鐵  
棺然其西鄴侯橋石函入下湖問趙宋諸貴人  
墅僅餘花園老卒歌一篇耳寶所山奔水導逆  
以海潮余坐落星石漱一勺泉下大佛寺萬柳  
成幕橋左斷寶雲山之東宋家花如錦曰錦塲  
及上秋陽臺淒神寒骨海風四起月到望湖亭  
誦前人語西湖溪靚空濶納光景而涵烟霏漫  
衍而不迫紆餘以成文陰晴之中各有奇態酒  
空急抵昭慶岸沽酒

初六月紀

汎曉湖及湖巒光盡紫海雲未斷出寶佑橋即

橋

紅袖青旗總宜

名園

涵碧

名橋

彷彿觀之孤山巒

立長烟初淡山水未深余觀第三橋碑不祀鄴

侯今與白蘇處士四曰四賢祠然范文正張忠

定朱徽國不宜入耶其巔歲寒巖樂天就四照

為竹閣而麗農樓快雪閣萃其勝南陸宣公祠

今益以嚴光林逋趙忞王十朋呂祖讓張九成楊簡宋濂王琦章懋陳選陶大臨

又南

六一泉東坡先生惠勤上人哭歐公處也孤山

飯罷送客上湧金門泊藕莊飲雷峯下南屏披

峻壁翠落蓮花洞口久之乃歸臯亭諸山飛翥

如亂雲補兩湖之缺斗折蛇行與燈明滅在孤

山語處士曰有是哉處于清濁之間歐焉蘇焉

范焉白焉參寥焉慧勤焉甚之而韋后焉賈似

道焉

初七月紀

殘醉未醒閉戶作句客作竹就飲池塘蕭條夜

深與客過溜水橋月漸低急放舟十錦塘月影

半浸湖如擎寶幢卽之微縮斜下如懸指漸一指片指俄落寒潭光經時不散桂輪自水中央的爍兩峯高處月在天而半在水而圓比于山高月小余進一籌矣

初八月紀

行唐刺史九里松下長晝風雷江濤夜合隔林先作雨昔吳說書額高宗揮數十幅不能及天矯作勢萬乘辟易松旁麴院宋取金沙礪水釀官酒由合澗

北自靈隱南自天竺

登北高峰山起歛出

睦跨富春控餘杭局結錢塘突爲峰鳴雞見日升盤三十六灣而陟西望羅剎遙接海邑郡城飛來峰樹自崖谷擢起根生石外翠蕤蒙羃鳥悅山客開洞口龍泓宋丁翰之月夜集鸞處問靈隱浦惟流泉淙淙跨澗一樓亭冷泉于巖面寺暗林香青林洞之北昔人長嘯集猿呼曰猿父爲建飯猿臺逐侶出雲呼兒歸洞最宜向包氏山房一聽猿啼松落三竺之勝亘數里自飛來轉寺後如伏虬飛鳳稽留峰介天竺之中遙

響飛空歸流欲瀉大悲泉流講堂下空巖懸乳  
幽淙嶺在其東南深壑巉巖艸叢石瘦仰天一  
線至捫壁嶺左逼障右臨溪而活沙塢滑善崩  
上天門湖海一色矣自錦堤歸忙上保叔塔觀  
落日山高峰蔽畧見紅霞數道到寺門海日蒼  
黃倒影余乃自梅花嶼之北婆娑深樹旋下客  
舟斷橋賓月忽被孤山一角水底影破則狂叫  
月旣下偕琴僧過第三橋道人臥呼之不出龍  
王廟後一水臺攀而上彈雙清一曲水靜夜寒  
游魚不出波淺舟閣一夜凍湖心笑前人行過  
畫橋天忽曉誰似我中流自在須臾漁燈影綠  
樹數峰欲青雲起如烟易小艇傍湖心亭杲杲  
日出

初九月紀

是夜雨

是日觀百妓會禮十

廟湖心亭看日出故亦書月

錢塘門百妓會十萬人家市聲到海皆成紅霧  
俄見飛騎者八石榴裙擁始由鎮海樓上子胥  
廟山自天目翔舞而東瀦于鳳凰薄湖掠江左  
折吳山江介海門昂首穹脊掉尾內向道士曰

晉天福江水溢寶達呪止之夢偉人曰員聞命  
矣予笑曰豈有地老天荒數千年怒不少殺而  
擊山破岬者哉所至前瞰江後俯湖則三官廟  
最風搖泉韻淅淅出石罅視之旣靜其聽始遠  
則青衣洞最雲開山露雨過竹涼高見滄溟則  
雲居菴最巖竇窳窳秀石玲瓏鶴髮龍骨蹒跚  
其頂壽藤怪蔓羅絡蒙密于霄之木根不土芽  
寒泉滴瀝乍繁乍細煮石篝燈十宿洞中不能  
言去則瑞石山紫陽菴最昔人云石者山之骨

相也吾獨取夫怪怪奇奇者焉彼固化工之所  
深寶也譬之于士亦豈以狂狷爲非材也哉峭  
削凌空白露夜滴則橐駝峰雪風洞最若夫三  
折肱而凌霄則真人殿庭一樹最蓋仙窟云丁  
野鶴蟬蛻鬚眉尚奕奕永樂間御書招張三丰  
不至今塑三像祀之坐立余謂夜靜何人吹鳳  
管三丰臥也霜林葉盡羣峰出三丰立也肯與  
冷泉作主一百日不用二十四考書中書三丰  
坐也

初十月紀

泊岳墳三橋三妓驕嘶綠楊白衣躍上捷如飛  
兔爲浮數白已送客湧金門清波遠烟一片紅  
粉銷歸何處中流忽聽客呼遂上其舟又是一  
番泡影矣

十一月紀 是夜微雨

鎮海樓之南爲寶山誦子瞻詩野客歸時山月  
上棠梨葉亂暝禽呼及同秦仲二子游云平明  
已報百吏散意卽其几席湖山簿書魚鳥處也

玄妙觀問洞賓題蕉處一龕烟火而已白馬廟  
折而西曰七寶山少游夢天女求贊維摩像處  
昔雲閣黎居山坡入方丈小院見其隱几低頭  
讀書與之語漠然不對蓋不出十五年矣後贈  
以詩有讀書常閉戶客至不舉頭句余謂作吏  
如子瞻可以游釋如雲閣黎可以從吏游

十二月紀

清波門折而東南曰鳳凰山左江右湖千山軒  
翥其麓爲萬松嶺唐宋州治卽錢王故宫云宋

邇大內碧瓦鱗次植日本松作觀堂三茅觀鐘  
鳴觀堂之鐘應之則駕興山背芙蓉閣風帆沙  
鳥一溪通小西湖亭曰清漣萬松入蟠介亭諸  
勝皆列皇城之外江干皆禁籞紹興福解陳修  
表蔥嶺金堤不日復廣輪之大太山玉牒何時  
清封禪之塵高宗手書懸壁然淳熙間孝宗及  
皇太子朝上皇德壽宮爲泛湖觀潮亦盛事云  
嗟乎韋后不挽欽宗之輪而一目存誓嗤于道  
人及乳母抱度宗行廊廡手粘一塔影歎宋家

無復生氣弔閹貴妃詩南宋可憐無故主西山  
空自夢朝雲悲夫自梵天寺而北折而西爲勝  
果禪寺臨江突兀南連秦望東亘吳山笑語落  
富陽月巖最善中秋清輝滿隙如合璧左爲中  
峰宋殿前司營在其右石筍林立錢曰排衙白  
塔小竹石壁夾道古石衙云樹散雲收虹殘水  
照歸由湧金喚渡得月柳洲亭白雲滿川飛浮  
來往水皆縹碧

十三月紀

參寥泉

舊在孤山徙築于此有泉出寺後仍名參寥焉

西爲宋布衣岳

琚祠又西爲錦塲其巔初陽臺葛洪吸日月于此驚飈作危墮勢峰拔地削立數千百尺龍瓜拏攫鐫洗萬古如新每作雨崖鐵色紫陽先生嘗提舉浙東法得祀祀其下葛嶺之上舊招賢寺白樂天詩雖在人間人不識與君名作紫陽花子瞻入壽星院悟前身曾到此昔似道婉儀彌遠架廊疊磴而趙紫芝與葛仙翁並墓其下不知後人如何作眼寇萊公集妓賞綾千段舊

桃獻詩萊公默然及貶嶺南道杭州桃疾曰葬我天竺山下樂天拈花爲喻子瞻拈身爲喻舊桃拈織爲喻皆老禪也又聞坡公仇池筆記杭人喜食鷺日屠百湖上夜歸百鷺皆號若有所訴嘉靖間侍御令巡官日報屠鷺之數日屠一千三百有奇噫坡倅杭時戲語酒食地獄高穀繼之獄爲一空今鷺獄亦宜空矣晚上湧金酒舟歸自昭慶步月曲港湖艸層委聽小橋流澗立斷橋湖舟不行穿瑪瑙寺抵石函橋皆作響

湖水空明荇藻交橫

十四月紀

從野堂諸君子與偕儀伯季生么暉君翰修正  
曰放星芝子懸約余由昭慶寺後取徑桑堤山  
圍樹周西湖如艷妝山陰如翠幃深處此中蘭  
湯浴罷時也月皎甚移席廣庭山如碁布瞰巖  
而峙爲態舒緩草木蒙籠空青微出飛鳥時歸  
紛紛點石儀伯歌與偕和出門四山如畫風露  
浩然行一里至渡頭返曉起讀行卷唱吳琚海

門飛上明月

十五月紀

是日觀潮

浙潮銀山雪屋有頭數丈或曰浙去潮近赭龕  
兩山橫鎖江口衝突颶激他江去潮遠湧水而  
已余觀潮兵馬司前目逆海門兩山嚙合士女  
雜浪花中日下春玉抹烟屏山鷺一行憇萬松  
嶺絕巘左一亭秀出巖阿俯瀕海西湖雷峰  
如坐如臥松濤峻絕若斷齧逶迤表忠觀讀子  
瞻所書記余謂千古絕得意少文其次謀止高

麗王獻金塔疏莊嚴有體一文並得之湖文章  
有神矣古云胷中無萬卷書眼中無天下奇山  
川未必能文縱能亦兒女語耳坐靈芝寺門錢卽  
王祠承流寂寂俄見紫雲萬重荇藻鷗鳧皆染絳  
色數聲鐘磬千頃筵篋放舟錦堤樓舫齊垂楊  
亂拂紅妝吳姬半醉清謳凌于波上棹湖心亭  
吳越勝人各集豔姬嬌兒未幾歌漸杳月影在  
地繽紛殊狀余乃偕客自六一泉步西泠橋選  
樹四橋以下湖光深靚漁不張燈金沙灘口微  
曉遠烟微出海面

聞木魚五橋更籌亂六橋淨慈鳴鐘堤有行人  
還第三橋保叔昭慶鏗鏗相答行十二里而天  
按堤南一橋曰映波對西岸六橋舊有旌德  
觀先賢堂觀本定香寺寶慶間京兆袁韶改  
建有虛舟雪錦二亭祀許由而下四十人曰  
仰高祠花竹縈紆小山曲逕二橋曰鎖瀾  
對西岬五橋舊有湖山堂前擁雙塔後植兩  
峰四望洲回浦合三賢堂祀白蘇林三公

三橋曰望山斜對西岼四橋水曰花港舊有  
雪江草堂 四橋曰壓堤對西岼第三橋舊  
有崇真道院石臺籠燈以照夜船水仙王廟  
亦名龍王祠以樂天和靖子瞻附祀兩廡并  
曰薦菊取蘇詩一盞寒泉薦香菊 五橋曰  
東浦對西岸第二橋 六橋曰跨虹斜對西  
岼第一橋稍北爲西泠橋

十六月紀

由延祥觀眺竹閣故基移自孤山昔人祀樂天以杭

妓故園沉紅昵綠樂天去後倩妓傳詩耳西爲  
宋洪忠宣祠又西鳳林寺鳥窠談禪處也予笑  
白蘇兩公日與湖上人家雜處不辨官長湖光  
激灑如几案間物鳥窠猶向樂天愁心火相構  
識浪不停豈其曾中著一西湖耶棲霞嶺下弔  
岳武穆王閱新碑獄卒隗順負屍踰城至九曲  
叢祠潛瘞之以玉環殉樹雙橘識焉今并祠云  
其又西張憲墓夜闌飲垂虹橋須臾移第二橋  
斜望西泠孤山霞起空山響木魚海天欲紅是

夜游裏六橋

按楊公堤裏湖西岬也太守楊孟瑛旣開西湖遂築此堤增建六橋然近北山三橋宋時已有之楊公所築特南山三橋耳 第一橋近淨空院玉泉之水出焉曰環壁西通耿家埠 第二橋金沙灘之水出焉題曰流金西通麴院路游靈竺者停橈其間 第三橋近龍潭有時祥光浮水曰臥龍西通茅家埠 第四橋遶丁家山而東浴堤屈曲蒼翠掩映

題曰隱秀西通花家園 第五橋西挹高峰舊有景行祠西通麥嶺路 第六橋從定香橋而入近發祥寺虎跑珍珠二泉之水出焉曰濬源

十七月紀

仙姑山入青芝塢觀魚玉泉寺泉漑千頃靈鷲寺在其後北爲法華山而西溪秦亭則法華之分支也自行春橋出蒼烟老木間爲九里松余與客品松選奇輒狂呼林谷浪花仰激琮瑋

豁其南爲仙芝嶺而合澗橋峙飛來峰路口冷  
泉一亭清輝如昔偶憶樂天招韜光入城光不  
赴荅詩及黃紙詔下僧徒悵望歎達官不下山  
山僧不入城便是清涼世界始從岫嶠山房山  
半峰高百盤泉數十折長松夾道引竹流泉散  
如飛雨豈紅薑紫芽能教月下碧天哉菴有金  
蓮池純陽殿觀滄海日出堦前秀靈艸芙蓉數  
朶開屋薄老楓落紅滿地世外春秋艸木自寒  
煖塑像絕佳仙自塗抹雲氣自此陟風篁嶺林

壑深沉流淙活活自龍井而下四時不絕嶺故  
叢薄荒密元豐中辨才淬治潔楚坡云天竺已  
幽阻風篁更盤紆者也片雲石之上曰獅子峰  
高出羣岫可瞰江滸天竺諸峰疊繡如畫辨才  
送子瞻過嶺有過溪嶺辨才老焉曰歸隱橋語  
坡云與子成二老來往亦風流曰二老嶺其下  
宋陳剛中基建炎議恢復與張子韶等七人共  
謫詩云同日七人俱去國何時萬里許還家蓋  
足壯也片雲與衆二亭甃池構石彈碁流水龍

井大樾幽古石鑑平開閒花寂艸延緣其傍鳥  
韻相荅水東出茅家埠入湖古人云西湖之西  
浙江之北風篁嶺之上深山亂石之間盤幽宅  
阻嶺之左右大率多泉者也其左爲神運石龍  
井之上爲老龍井人烟曠絕一泓寒碧盃大海  
塊長江西湖如鬚髮諸峰膝行匍伏僅見天目  
翔舞一帶人家茫茫烟雲海氣烟霞石屋十里  
桂花撲人游裾道旁狼籍亂插枝頭士女賤如  
土已薄暮道太子灣西玉岑赤山之間惠因澗  
鏡檻鎖蛟高麗王子導澗中水甃池轉輪色如  
藍獅象含雲氣定香橋至四橋月上全湖金紫  
垂虹喚渡抵昭慶

十八月紀

是日觀潮

九溪十八澗僻江干游屐鮮至古無咏者九溪  
在老龍井之南其西爲十八澗葢烟霞嶺之西  
溪環者九水出江而北遶龍井十八澗則徑通  
五雲山雲棲寺昔柳子厚記楚山石曰以慰夫  
賢而辱于此者又曰其氣之靈不爲偉人而獨

爲是物故楚之南少人而多石予怪其言若杭  
固多名人卽賢而辱于此者豈在石下哉是日  
也憇漾碧軒金蓮數畝有鳴榔載紅裙曉渡驚  
破白鷗徐行定香橋張伯雨搆水軒夾赤山浴  
鵠溪水下烟霞嶺卽山左麓闢犖确爲徑杭越  
諸峰江湖海門在指掌洞曰水樂泉自頂下山  
之窪伏流飛注水波皺而聲漸激東坡詩慣見  
山僧已厭聽惟餘海月空留照熙寧間鄭獬名  
其洞云旁小築幽絕水樂洞在烟霞石屋之上

惠因澗北爲于忠肅墓蒼松一帶間以疎篁自  
六通入定光寺飲卓錫泉出麥嶺有冰雪堂再  
經龍井歷九溪峰窮水盡白雲自開山如落鴈  
蹲鴻每一澗鼻口相呀蹄股交峙岸之突而出  
者水滌之如蒼龍蛻骨環數小橋峰若起若斷  
艸樹蔽翳巖下磈礧多千年積雪有門半掩竹  
數畝法雲泉自嶺下凝乳花泉甚白度閣數楹  
小龕坐臥佛石居焉出沒煙扉間而光影在澗  
出復尋澗往山容舒卷澗分近遠履平地如深

洞凌高則作琴筑聲麓漸平潮泥浸野田江尚  
蔽顧洶湧作遠勢出六和塔則越山樹木人家  
影江面方候潮乘間入虎跑泉宋學士以僧披  
法衣焚呪久之泉乃出爲作記不審南岳童子  
遣虎移泉視性空權力何如哉出六和塔口初  
由月輪望潮頭余從轎上觀自六和至白塔嶺  
立峰際百越山窮潮頭九折天風吹海立孽赭  
龕直入富陽銀龍砰砢右望則大山蔽江一面  
直掠而上猛過西陵潮頭漸隱目送數十里外

知是嚴灘氣始平江舟盡泊六和口魚麗朝蹠  
起一江秋雪余乃赴客招且暮以炬上慈雲嶺  
其南爲龍山自天目分支沿江而東局結于此  
望太極亭八卦田王伯安書院伯安寄汝中盛  
傑天真之樂以此至湧金輿人呼渡余不可中  
途異風作湖爲推浪絕行舟道錢塘門月上

十九月紀

客邀上青翰舫抵湧金燈火遶問水亭晚渡極  
喧榜其亭云平沙水月三千頃畫舫笙歌十二

時予笑云只有六時耳那得有十二時夜訪小蓬萊飲極酣臥舫推簾拾斷橋殘月

二十月紀

曉入靈芝寺爲錢王故苑懋彭祖菴故宋聚景樓前學士橋鍊嶺諸山之水出錢塘門輸委西湖必經橋下其傍仙姥墩姥採百花釀酒仙後十餘年賣酒洞庭云南屏山羅漢室錢王夢十八巨人隨行一僧手像五百尊而化去宋表五山淨慈其一丞相鄭清之記雙井理宗書額古

車輦經行處也蓮花洞口居然一亭湖山在睫萬工池千年古樹交柯積蔭旁激洞石如砒雷宋乾淳舊賞曰小蓬萊在雷峰塔畔故內侍甘昇園峰類削雲喬木欒樞槎于石膚有理宗御愛松由藕花居而出林亭幽雅兩山岸湖皆饒別構北山雜市塵中如石函橋石确水瀏居人架木幾不辨山水南屏一望垂楊蕭疎可愛余又臥青翰舫居荇藻中以此酣適之味令人意遠折問水亭而南爲孫忠烈祠宿舫中四更高

嘯月臺晨起掠艸滿湖長堤如烟雨微見保叔  
峻嶒湖面

二十一月紀

棹昭慶看錦堤走馬堤盡一亭出憇金沙灘西  
湖以諸泉勝泉以龍井勝故金沙一帶皆流泉  
邃境第三橋歸追月玉蓮亭宋競渡奪標所笑  
此游春水梅花輪一著耳然當以九溪十八澗  
勝之應爲西湖樹我一標

西湖雜紀

初四日至棕毛塲散步石函橋俄見湖光如逢  
故人狂不自禁急呼小艇恣其所之 十九日  
暮已買歸鯉立昭慶湖畔見淨慈一帶巒翠欲  
滴湖含夕照逕渡湧金聽歸人爭渡再宿青翰  
舫樓月落枕上縱葦望湖亭將曙而別 四之  
卅抵湖是夜月初九雨初十月十一微雨十二  
之世一月看月湖心十七夜宿湖舟三觀潮再  
聞淨慈晨鐘于定香橋一六橋天曉一晝則極  
前人藕花桂子之勝編月紀之留作湖上逸事

嘗出湧金門北爲柳洲問水二亭問水卽宋  
豐樂樓址柳汀花塢歷欄檻前兩高峰夾菱歌  
漁唱一時會合 臥青翰舫保叔一峰在予枕  
簟推牕視之斜對斷橋惟見掠艸滿湖 西泠  
居兩湖之中花明如霞雜以灘鴻 觀月三橋  
梯上漾碧軒水淺舟閣一夜凍湖濱 雷峰塔  
老蒼突兀如神人搢笏 十五日看潮歸歷湧  
金錢塘清波三門遶湖紅霞千萬層倒浸湖底  
葦萊自蕭山惟湘湖第一第三橋近出葦不

下湘湖手捋之 方弄水中月影忽被孤山斷  
其一角 三潭印月舊在湖心今爲葑泥王洧  
詩塔邊分占宿湖船寶鑑開奩水接天 中秋  
夜余行第五橋至六橋聞淨慈鐘還四橋保叔  
昭慶鏗鏗互答 曉看孤山漂絮美女嬌兒逐  
電追影至第三橋盡矣金沙灘一帶流水無人  
偶見金蓮半畝中紅裙曉渡 曉起海雲罩山  
烟烟隨曉炊亂海雲猶浮其上 自龍井歸至  
第三橋月始上顧視湖平峰峰盡斂

陽山志

陽山社二十八則

一邀太湖以迎落暉

箭關

一候天雞以呼曉雲

浴日亭望海中出日

一撫晉栢以吸龍茗

龍塚之傍有泉有茗皆曰白龍

一鋤耙石以摘仙種

耙石嶺仙人種玉

一次雞峰以伴羽客

雞峯洞羽客幽棲俱舊題

一憑滴水以瞻桃姑

滴水巖之左有桃姑洞

一枕爐峰以恣野眺

箭闕下有香爐峰

一醉公孫以獎忠魂

吳殺公孫聖於蒸丘卽陽山

一訪元發以破巨浪

坡公集滕元發破浪相訪使人神聳墓在

陽山栗塢

一戲鯉峰以候龍鬪

宋陶弼於此山觀雙鯉戲老父曰龍也行

且鬪君亟去是日覆舟弼免

一弔顧

元慶

岳

岱

以復修綠

山房名修綠元慶有陽山新錄

一禮白龍以核建置

龍母廟在西隧新祠在澄照寺前竝存

一嘯鶴山以迓令威

一東北白鶴山丁令威宅有丹井山產白堊  
一考書堂以遲佳客

宋端拱初謝賓客濤講學於仙泉院之西  
廡

一枕巨巖以看飛瀑

滴水巖四時不涸

一移襍構以顯石壁

山峰惟石壁最佳王文恪易以長雲今爲  
屋掩欲盡出之

一扁學易以平愛憎

李嵩隱山玩易有不緣懶出忘巾櫛免得  
時人有愛憎句

一理艸堂以新唐句

山有顧鍊師艸堂唐李頎贈以詩

一默禪誦以紹淨因

正德寺僧道昂暗誦法華每入城持諷數

周

一訪古墓以祇先哲

吳鬱林太守陸績漢豫章太守陸烈山陰  
令陸寂宋鄭虎臣滕章敏公元發王節愍  
公倫又有瓊姬墓夫差義子塚一十八所  
節愍公死於金其子負骨以歸

一坐雲泉以躡八景

雲泉在大石石若頰頰斷齶黃姬水八景  
曰拜石軒毛竹磴招隱橋宜晚屏玉塵澗

青松宅楊梅峒欵雲亭

一臥山房以譜十友

元慶大石十友譜端友石屏陶友古陶器  
談友玉塵夢友湘竹榻狎友鷺瓢直友鐵  
如意節友紫簫老友方竹杖清友玉磬默  
友銀潢硯

一審山銜以嵇古甃

陽山背陰面陽山如石砌曰甃陽山一曰  
秦餘杭山一曰萬安山四面若飛曰四飛

山大峰十五箭闕爲絕頂晴日望海中羊  
山春秋曰蒸丘又名蒸山產白玉脂曰白  
塏山吳越錢氏泉出寺生千葉白蓮改仙  
泉寺宋祥符勅額澄照寺又爲白蓮禪院  
白龍行宮靈濟廟今載祀典

一延淨侶以度徃生

一減奴子以靜山靈

一囊餘糧以施鳥雀

一訂佳節以盟蓮社

九月八日爲始十五日止

一全古墳以勸好事

陸鬱林墓在陽抱山陽山西支壠元朱德  
潤母感夢止穿壙後德潤官翰林子吉仕  
國初清顯又朱憲副穿兆近陸瑩夢云此  
太逼能相讓當有興者旣而子狀元

周希生

陽山社則

終

登陽山絕頂觀落照

嶺外孤亭攬翠開  
天風吹上四飛臺  
行如鳩鵲人持杖  
履曳星辰海一杯

突兀飛亭倚漢斜  
接天波浪欲乘槎  
低峰忽起千尋勢  
片日驚吞萬丈霞

太乙仙人嶺頭遇  
凌空賦就驚人句  
長風吹落半天雲  
幻作芙蓉插千樹

山僧指點面羊羴  
龍母祠前曲水分  
欲爲故人留落日  
猶堪持贈數重雲

白露蒼蒼深處葭平田漠漠遠無涯四飛一闕  
雲爲補九日明朝帽欲斜  
澹染蒼霞滿袖斑泉聲落石聽潺湲老僧昨挾  
江濤至却傍陽山說蔣山  
月滿空山夜色蒼碧天無際思茫茫風高古木  
喧龍子波繡珠宮駕海王

禪房夜坐

山童滌杯進茗老僧揮麈談空一室半關天地  
千巖忽響梧桐

長雲僧舍和韻

絕巘懸精舍虛堂白日閒無多牕外樹不盡眼  
前山碧水沉湫冷蒼雲點石斑儘看留客住何  
必鑰重開

觀音巖看月介公至

風前欲自笑雲外若爲期忽報山僧至山深知  
未知

空翠庭梧桐

梧桐何太瘦亦在萬山巔月落空庭處迢迢下

遠田

箭闕月

缺月掛箭闕前村漁火喧秦王不敢射缺月月  
將圓

玩月後山房剪燭邀諸君子修蓮社品山  
中位置時廣德友沈君翰次日行

天近邀雲坐風高蹴月行山空心愈淨松老韻  
俱清江海原無相見曹也自尊蘭芬聯左席玉  
露滴前楹下榻秋分夢鳴鐘夜課經禪龕舍竹

隱漁火過溪熒未着觀空眼偏饒度世情幾年  
學面壁今日反浮萍無菊堪醺醕登高憶弟兄  
茱萸緣岫采薜荔援壻生琴動禪心寂棋敲鳴  
樹爭且因燒燭短莫便賦詩成掃葉頻吹茗披  
箋爲引瓊尋香花影宿擊竹落筠輕惟石藕爲  
供香厨芋作羹伊蒲和露煮丹井搗霞烹咫尺  
風塵迴蒼茫天水并偏宜秋夜永喜共故人賡  
方寸惟杯酒寒楓染去旌相看誰獨醒萬丈只  
孤撐曲沼開蓮社空林訂法盟山山將賀九樹

樹盡和嚶峰闕綠嘗滿忙還閒自評我方論半  
偈月已過三更烏奏花間漏霜分殿角鉦俄看  
千萬頃紅日爲誰瞪高季迪詩但覺羣山總在下坐撫其頂同兒曹  
賦罷硯有殘墨再作一律貽嚴玉式望亭  
建橋未就併詢之

身上最高處馮虛屬眼寬月來滄海白秋老洞  
庭寒水落飛虹迴天空度鵲難中山有蓮社欲  
解故人鞍

臥起

兩離兩坎極無極無極元來日日新不爲風塵  
伸赤手常將天地照人心

長雲峰下臥崧高一夜天風叫海濤笑指扶桑  
懸赤日未醒塵世利名曹

亭開山頂山還闕日入淵沉淵又生不向此中  
清徹骨青天相對只盲行

離九天南日最尊如何浴日在淵澄淵淵徹底  
藏根密身坐雲霄已萬層

登高莫笑世間迷斗柄茫然東與西急束道衣

捫蘿棧錯尋海底又前溪  
以手指月月在天以波印日日在水碧蒼繡出  
千龍鱗海嶠未離君知否

擁被天風臺候日

擁被跏趺坐蕭然一鳥鳴波雲猶半黑天水未  
全分風樹搖星影平疇拂鑑明赤城疑漸近湖  
上小山橫

海日

中山清漏徹蓮花翠冷曉岫濕露華杯引滄溟  
分席近杖携星斗過簷斜夢回覺率空千界目  
極扶桑燦五霞一自咸池歌浴日天雞呼醒萬  
人家

歸舟慶西山廟橋成謁晉王司空祠擬作

銘

有廟維赫有橋維屏僧彌難弟法護難兄不家  
於家乃家吳氓祀二公者非公寧馨惟德是念  
非捨無名千載之後蔚有鉅卿墜崖危磴不令  
不寧濤飛樹杪涉阻荒荆相彼樂國憚於太行

濺平鴈齒瓦秩魚鱗星梁斗柱銀漢式憑雲濤  
雪浪玉虹崢嶸司空執劔司徒鳴鉦聳立其上  
揚旌拂旂駿惠南國麗牲貫星三秋月色半夜  
鐘聲尸祝湘澤楚張司農重建以莫不增樂奏笙鼓勿  
替雲仍履安思危爲善如登

九日曉登陽山懷黔中高明柱

有引

憶中秋與明柱飲酒仙祠歸舟遺其中以  
十五網而得之酬漁父三百明柱東云不  
佞輕萬里而識荆致先生非九日而落帽

但網客索貲太奢殊非江上丈人風耳時

明柱在天目山馳訊却寄

旭日亭亭護曉霞懷人極目各天涯却追落帽  
驚龍府翻使懸旌望海槎嶺外白雲天目鴈樽  
前黃菊洞庭花君來萬里交情重烟水迢迢隔  
漢巴

附陽山龍母塚考

東晉隆安中山下居民繆女及笄出行暴風雨  
立龍塘側俄見一白衣老人與語歸姪父母逐

爲丐明年三月十八日今龍塚上產一肉塊居  
民棄水中俛焉塊破化而爲龍夭矯母前若有  
所告其母驚絕於地雷電飛沙折木咫尺不辨  
旣霽但見白龍升騰而去衆乃厚葬其母祠之  
山巔恒雨暘禱必應太平興國間建廟山南曹  
巷熙寧九年遷澄照寺東隅建炎間主僧覺明  
新之相傳龍子以怖死母故謫居瀟湘每歲是  
日必歸山間風雨淒冷胡偉碑又云每歲誕日  
龍歸省母前期旬日天氣肅寒四山烟雨乍晴

復合正誕之辰龍必見形或長身尋丈隱於衆  
山之上或小如蜥蜴依於廟貌暴風雷雨澍溝  
號木則其驗也紹興十九年六月某日奔雲驟  
隳盲風驟雨捲去女墻數百丈居人余氏吸入  
雲中負販者吸而復墮無傷焉有士子焚諫書  
祠下乃稍止嘗有白鬚老人至鎮江買船自云  
從長沙來與船人錢十千約其至蘇州陽山看  
親處還登舟卽令篙工悉睡日暮抵滸墅舟人  
至山下於廟中像前得錢五十貫乃以錢設僧

供辭謝而去大吏以聞紹興二十九年四月賜  
廟額曰靈濟乾道四年誥封顯應夫人我明  
革夫人封號止云陽山龍母之神每年誕日城  
鄉畢集祀龍母於東祀龍於西率以爲常謂之  
龍生日按宋范至能又以繆氏爲邢氏羅春伯  
見聞錄諸書謂湖廣長沙瀏陽道吾禪院旁有  
龍潭卽陽山白龍所居而海鹽乍浦之陳山有  
龍湫揚州興化之率頭湖有龍潭皆此龍別居  
云

### 陽山龍母記

陽山祀龍母跡甚異其有關於稽人甚大龍而  
姓之母之子之白衣語而娠娠而棄之塊而龍  
之母死而塚之祀之自山巔遷曹巷再移澄照  
寺龍去之楚廟食長沙誕之日神具來士女咸  
集頗恠然晉隆安以來未改也尤異者白衣搖  
櫓長沙僅一夕而泛吳門仙井濯鱗帥漕率兩  
邑而興神物紹興己卯所部以禱雨聞乾道戊  
子守臣以加封請於是額曰顯濟褒顯應夫人

云國朝大學士金公幼孜文定吳公寬雨泉陳公鏊幼海周公天球皆記之宣德五年太守况公伯律奉璽書減荒賦百餘萬積歲大稔終周文襄之世餘米滿倉而神與之語嘉靖間願齋徐公屆秋祭吏循例請委小吏公毅然不可而神又與之語此二公皆夢也夢見於郡侯何居且夫躬祭而有年者願齋也方出郭而雨者弘治孟郡公俊也意疾痛則呼父母豐年則昇祖妣猶與享之乃以成熟報歟然他人夢夢公夢

醒神有語有不語耶居民上神所不語蓋有畧於祀者矣况公齋宿而夢徐公夢白蛇游於庭已謁廟壁上圖白龍而驚報祀也周室中興旱旣太甚至靡神不舉呼羣公先正莫我聽聞豈事神別有道歟記稱龍去其母若有患苦蜿蜒二郡庭若有控訴今此下民亦有訴也苦役賦甚或又曰龍天矯飛騰鼓雷霆潤風雨奚患苦之有寢與之間乍往乍來楚天接膝奚控訴之有然且有苦也有訴也况民乎雖然龍亦有民

之責 天子獨憂於上賢能協贊於下扶杖携  
筇思見德化不呼龍誰呼哉嗟乎今之爲龍亦  
難遺秉宿穗降福旣穰穰矣公私之積皆空徒  
嗟瓶罍豐凶之粟竝貴空羨倉箱吏茲土者難  
龍子龍孫晨昏之際職思其居亦不易也竊願  
龍爲其難爾嘉靖之役鄉紳袁公祖庚爲之倡  
夫出雲雨與出金錢孰易也

復龍母舊祀記

陽山之有龍母塚也自晉隆安始也龍子廟食  
于長沙以三月十八誕龍日省母士女畢集晉  
以來未之改也祀山嶺千有餘年其始遷山南  
曹巷自太平興國始也再遷澄照寺紹興己卯  
帥漕以禱雨聞則曰龍濟乾道戊子太守姚憲  
以加封請則曰顯應夫人 國朝一剞於况公  
鐘宣德五年學士金公幼孜記之再夢於孟太  
守復弘治庚戌吳公寬記之三歎於太公徐公

節嘉靖壬戌陳公鑿記之自徐公後又二十年  
鄉紳袁公祖庚倡助周公天球記之澣墅戶部  
張公節太守朱公文科二守孫公成太吳邑侯  
傅公光宅告成事今距之又數十年諸文學踵  
門以請余喟然嘆曰龍而姓之姓而繆之母之  
子之肉而塊之塊而龍之龍而白之母死而去  
之去之楚而誕之日鼓雷霆來之异哉异哉以  
爲異也碑記所稱白衣附楚舟給儻直自長沙  
一夕泛吳門舟子入廟門風風雨雨儻直之半

藏龍母帳中誰爲爲之乎後唐天成二年殿西  
仙泉鱗物見郡丞楊杭帥炷香鱗湧誰爲爲之  
乎此二事一見於紹興庚辰一見於紹興壬戌  
或又曰後唐天成二年殿西仙泉鱗時見竊有  
感於兩太守之夢况伯律奉璽書減荒賦百餘  
萬神與之語葺祠後積歲大稔終文襄之世  
餘米滿倉徐願齊夢白蛇蜿蜒庭中若有所訴  
以語雨泉公秋祭吏請委官代不可見壁間畫  
如夢爲之捐贖大有年事之以有禮報之以有

年而夢皆徵于郡疾病呼父母豐年畀祖妣其  
猶與享之故以成熟報也居民上而神之所不  
語大都繇祀不親鰥寡罔恤故他人夢夢二公  
夢醒今東南力困粟貴十餘年神互先醒龍昔  
者有訴矣今此下民亦有訴也龍無意乎敬龍  
必敬其民高太史季迪賦陽山不云乎中有一  
泉長不枯乃是蜿蜒神物之所都

### 再游陽山記

游之難難於天初四日微雨乍晴得月次日又  
晴得日陽山鼎建已載小誌丁巳季秋自白塢  
嶺訪丹井龍張雙睛以待燭舉山之半此山四  
飛環山如魚之鼓鬣而鯉魚峯一帶噴沫更佳  
最宜黃昏作一幅瀟湘拖雨觀小憩禪龕爲彈  
漢宮曲未終秋葉滿空階登臺一望峯如插天  
王文恪公所題卽舊顏石壁處一片芙蓉混以  
庖廁欲出之周浚蓮池待龍部說法其間鯉魚

峯而上有觀音巖稍進則亥龍石曠而邃宜閣  
閣斯萬頃杯千山塊仍移長雲峯諸雜構布其  
間千古大快心事是夜爲禪伯適禪爲酒人適  
酒爲琴侶適琴最喜作詩少耳五更綿絮裹頭  
捧一壺陽羨茶候日出執禮甚恭因憶去年此  
山中看落日會送友歸廣德余有欲爲故人畱  
落日尚堪持贈數重雲句蓋餞日也坐望海色  
漸紅紅光中如煙微抹海上山也蒸起而煜疑  
日久之未也初如一星甚爍曰日也又久之星

漸曲曰日未也疑別道出左右顧日輪忽擁若  
焰中聲盤旋浴同人驚呼浮空盪摩海煙直上  
衆星如壁上諸侯忽然自解或曰賓之初筵雜  
客無敢廁耳寺僧曰有住山數日不得觀或得  
日風散之海與日混濛微見黃絕不類此日出  
時海底如又日曰第二日余曰第一影耳始海  
而湖千流見需而絳始四飛之絕頂而石壁千  
峯見需而碧四飛有亭箭闕最高處余曰四飛  
山名也亭宜一住有獅子窩如紫鱗徑極巉友

人真長拂髯闊步而下數百丈無懾色余與語  
易之習坎曰天險不可升也正爲有脚力人開  
一眼遂斂足逡巡禮白龍母祠龍之母繆氏產  
龍而塚于此塚下方井卽白龍泉產茶絕佳就  
泉煮茶移晉栢下晉栢大四圍一本十四榦榦  
如龍鱗疑卽龍也不知何人伐其二榦龍歲一  
覲母水深平地三尺寺僧棲於樓昨歲龍來空  
中飛數千石塊下龍取晉栢一枝擲于某家園  
中懸數十丈殿大圮余謂旱則禱神無事敝其  
廬而不之計或宜聞於主祀者以先圭璧之求  
歟噫寶閣成石壁出徐議龍祠矣

堯峯山志序

讀書堯峯之巔自石湖十五里山水廻合初抵  
寺白浪千頃疑震澤有峯遠秀疑縹緲山僧曰  
此楓落吳江也郡諸巨浸也松之泐也突兀如  
神人虞山也美好如姬黛玉峰也又數里陟妙  
高峰三百太湖而穹窿陽山率靈巖諸巒障其  
後稍下多景巖西山點點漁郎竝坐又嘗妙高  
觀落日湖山一島桃浪一葉皆含靈妙其了無  
意况者彊畎耳溝池耳村舍耳夜半月華如雪

湖天渺渺向所鄙爲田叟野烟牛羊下來之隙  
無異萬千頃之洪濤也余無以名堯峰惟記在  
山中作續詩餘序云始見松陵之城郭若龐山  
同里諸浸焉澹臺寶帶磧沙陳湖之濱焉泖湖  
若練玉峰若環橫山若盤穹窿若賓陽山若拱  
虞山若垣錫山若龍上方若腕石湖若盃焉自  
青莎塢萬玉隈而上浸吾腹者三萬六千頃之  
半焉泛若鳧凡三十餘峰焉荆溪之銅官雪川  
之碧巖如鵬決起焉天如薺焉舟如月焉日月  
並出焉落日之帆如雪焉霧霽見一頃焉電起  
閃一峰焉月上泛一波焉雲開獻一峯焉吾見  
夫人蠓蟻焉飛塵焉而以拜石則神人焉袍笏  
焉丈人焉一草一木皆頂禮焉新鐘鼓之聲壯  
雲山之色焉凡此者皆天地之餘所謂旁望萬  
里之橫山而皆青翠俯察千仞之深谷而皆黯  
黑吾乃忽然而捉筆亦如天之一北一南地之  
影長影短箕爲傲客房爲駟馬而已噫終無以  
名堯峯也

堯峰山興福庵齋僧常住田記

甲寅之秋坐堯峰而志之一艇過石湖館我於  
清輝白雲相往還品峰題石或當暮眺星月相  
亂宿鳥撲刺予乃篝燈極思曉起賓日太湖忙  
煮山泉朗吟於勸春之禳家夢之崗又時携短  
瓢與釋悟亮坐白龍洞言其師湛公蓋百年來  
吳中緇徒行義高潔類師若弟者罕矣戲謂山  
盡石也石田可耕乎風雨欲來蘸硯池爲寫贍  
僧田記去今十有七年亡何貿田三百畝柴山

三百畝以崇禎戊辰歲八月得請於邑侯陳公上請大中丞曹公自津役之外捐其繇夫計僧而田之計田而夫之夫不厲禪僧不蠹食舉甚光且天下半浮蠹與其食浮於人也無寧人浮於食方內外皆然而方以內似尤甚何也誦者居上爨者居下是食有別也孤雲野鶴一飽逕去是食有節也飲食豈細故哉堯舜在上登峰躡頂能無動乎當事之風厲遠矣寺故有寶雲敝衣糲食其道益尊後有雲谷王文恪作記云今天下之事廢而不舉者亦多矣彼獨何修有若易易然者乎嗟夫廢閣在縣寓而修舉在佛刹士大夫靳齊力孤參養而僧徒叩魚磬祝太平尚其飲之食之教之誨之哉

堯峰山

堯峰山在橫山西唐免水院在焉今稱堯峯寺

有妙高峯多景巖碧玉沼寶雲井白龍洞觀音

巖已上存清輝軒偃蓋松東齋西隱已上廢十景姑蘇

志

橫山週圍甚廣環以佛刹如薦福楞伽寶華堯

峰之類皆在焉其支隴傍出各立山名堯峰山

在西麓堯時人民避水登此故名下臨太湖最

高也

吳邑志

壽聖寺

古免水院在吳縣治胥門西南四十里堯峯山  
唐末慧齊建院宋改曰壽聖寺寶雲居之弘治  
初蒞與文通修大雄殿觀音殿龍王殿東齋西  
隱住釋廣愈通震

露禪庵

在龍洞西南性公建下庵曰興福以塘名興福  
云庵在縣西四十五里宋咸淳二年性澄建  
吳邑志性公復之露禪庵有妙高堂大徹堂法喜軒

淨信軒七佛樓華嚴樓關王閣衣荷池漂菰池

二池浮青庵余名在鴨踏嶺一道吳山一道靈巖

住釋悟亮露禪庵悟繼興福庵

吳文定公祠

文定公諱寬讀書山中繚以石垣皆公力也祠  
在觀音殿之左有柏森峙曰文定柏志仰德云  
堯峰十二景

清暉軒

在免水院袁袞詩樹杪見風帆正對南湖水蒼

露臺芙蓉塔寶公塔也 余名之上古清暉軒也樹雜崖  
傾日月蔽虧余以題柏志其舊云

碧玉沼

在免水院色如碧玉面南湖下有神螺

多景巖

在免水院西南石廣而平甚狎湖山如吳江之  
烟樹茗霏之雲峯銅官之落日石湖之雪鏡西  
石之樵歌風烟舟楫水樹千重而白沙虛壁最  
宜天山雪後

寶雲井

散玉峽搗寒余題

在免水院寶雲鑿周益公南歸十景井其一也  
徐中丞源為之記

白龍洞

洞飛白龍故名釋性公創雲阿居焉其巔有望  
湖亭今廢

觀音巖

在龍洞之北其巔二重更峭突叩之欲浮石  
梁翠壁幽深奇絕吳邑志

偃蓋松 廢

懷深詩寒松門底如張蓋

妙高峰

峰勢半落青天晴空歸鴈暮雲無極而青翰日落深樹月飛空中雕梁也

東齋 廢

王山人寵詩旭日散高齋王司馬世貞詩跌坐看西山

西隱 廢

王寵詩羣峰闇將夕又按懷深詩如今滿眼事奔走欲向何人話此心生于東没于西諷之也

鐵塔 二景志不載○廢

王世貞詩當時鐵輪王建此七寶樹

半峰亭 廢

蔣堂詩寶雲構茲軒接引心不倦

鯨吸巖 題石十六 日涉園 題石十二 勸春檐 題石十四 萬玉

隈 題石十六 客鴈塘 題石十四 渡松壑 題石十四 駐霞城

題石三 薺月簷 題石十六 天湧巖 題石十八 青沙塢

題石 家夢崗 題石 喧閣 題石 平虛庵 題石 予定

登堯峰道六

陸道四

一從西石村至多景巖繇家夢崗喧閣青莎塢

鯨吸

巖入免水院

一從西塢至日涉園躋百步堦

一從鴨踏嶺至觀音巖

一從興福庵至觀音巖 二道俱繇浮青庵

水道二

一從石湖越來溪至王山蕩山欲盡而隱尾一

水涵之

一從木瀆抵興福塘按胥口之水至木瀆香水

溪出焉又東入跨塘而越來溪會矣

山勢第一

李彌大詩雲峯何岩崑去天凡幾丈厥向東也

山原天日發於陽山自陽山分華鹿而南迤邐

天平旣靈巖別繇穹窿而東止楞伽沿具區堯

峰突兀焉繇石湖抵山范成大云行人半出稻  
花上溪山廿里衣帶皆飛寒色

具區所見如莫釐縹緲馬蹟龜山禹期禹會諸侯此

夫椒敗越處葉余長沙亦曰長沙門衝武吳王養虎于此獨

小椒與椒對而差小大貢小貢思夫秦人採藥不返妻思之至死大

雷小雷兩山相對而不相見見則有風雷之異東岳西岳龜與龜相對

而差三山相近東西曰鳴山五石浮山五山相近猫山鼠山

對時如猫捕鼠謝姑小謝姑白浮歷耳筆格茆浮苧浮

青浮杜圻大都落日半啣峰峰獻曉恣觀覽矣

山一支自穹窿亘香高峰胥橫楞伽白石黃獅

何至洞庭穹窿君也

山一支自陽山亘大石玄墓銅坑華鹿錦峯玉

遮白陽仰天琴臺高景天平支硎定陽山君也

橫山張巨翼上方脅也

白石黃獅何四山不連如落星焉

水觀第二

水經吳萬水所輳觸地成川源太湖入海東入  
于河為三江鮎魚口北出至分水墩為澹臺湖

而黃天陳湖獨墅尹山諸湖爲之滙自分水墩  
南連吳江爲龐山同里其旁流汾湖泝橋李東  
通泖自沙湖轉而北則楊涇蠡口東流海虞之  
雲和塘而崑至和塘自陽城湖並東入吳淞江  
新洋其瀦太倉者自新洋江合栢家瀆夾鰻鱧  
瀆皆在峰巔指掌未見者福山之道江梅里白  
茆之道海然茫茫天水不知孰非海孰非江也  
少讀宋單錡水利志築吳江之千橋以通太湖  
及從山巖一望城邑漂水面鮫人夜火差擬大  
樽曉日露凝爨烟與水平矣

自胥口東出吳山之南堰于白洋灣其水渺瀰  
折北瀦爲石湖

越來溪起石湖東沿至橫塘一帶越自松江北  
沿橫山鑿溪入吳卽此溪也宋參政范成大因  
溪故城爲亭榭焉

吳邑志

太湖西首無錫東躡松江南負烏程北枕大吳  
其水發源有二一自西北宜興來一自長興山  
蹊來却從長橋水口流入吳淞江又東流二百

六十里入海

吳邑志

三江松江婁江東江也其水口在吳邑東南三十里名三江口一江西南上七十里至太湖曰淞江古笠澤一江東南下七十里至白蠅湖入海曰上江亦曰東江一江東北下三百餘里入海曰下江亦曰婁江胥口太湖之委自三江外其支流一東出香山胥山之間曰胥口謂太湖東邊兩山對峙南曰胥山北曰香山中一水曰胥口

鮎魚口自胥口東流北出

吳邑志以上言水簡核故

悉載之山中水觀最為大也

鮎魚口轟于波面如鷺一行焉

王山橋挂月一鈎近之則滿

直星港如箭

石湖如盆盎

### 品石第三

世間有情之物莫如石以情生不以情死莫如石余游西洞庭焉石公龍嘴間須臾風湧千頃吐吞然不逮堯峰矣何以故開闢有堯峰而奇

堯峰之石自余始堯峰之示人少矣

按吳縣范志云太湖石以生水中者爲貴石在水中歲久爲波濤所衝激皆成嵌空又按陳洙太湖石賦駭立驚犀低開畫屏素烟散而復聚蒼苔死兮又生譬夫枯槎浮天黑龍飲水鬼獐無狀雲飛乍起夫此咏庭中石泐自湖者耳不知湖石佳者皆有根抱雖拳石難拔其可移而之庭皆蠢石也宣和朱勔造巨艦載一石入京師以千人舁進役夫各賜銀碗并官其四僕皆怡悅不堪持贈矣

烟雨妙高觀落日微見數漁艇久之百帆出山外有青山落日故人情以青山贈我也白雲自怡悅不堪持贈矣

日將西下湖水半白帆如雪其矯舉如雪之飛也

坐龍洞四野密雲蒼山欲沒大雷電炤長而聲

微

雨中松如泉下峽尤宜枕簟其聲厲而多思

白雲類繞絮彌巖谷間浮一縷霧散而樹沐

雨至谷響林偃樹如驚鳥晚山綠烟淡抹夕陽  
暎之明月來時隱隱遠波欲紅日未見也

法鼓禪燈木魚清磬師也歸鳥落葉飛絮浮烟  
友也鶯語未滑好花欲放佳樹春望

自寶雲井至妙高峰觀出日一徑也

青霞生餘峰經聲出半嶺

方春菜花開客舉一似余曰似菜花隔湖花尤  
盛客又舉一似余曰似隔太湖菜花未審雪山  
何似

承節郎及金帶劬遂爲威遠節度使而封石爲  
磐固侯皆蠢石也雖然太湖石竒矣以堯峰勝  
之非居山一月不能知也

#### 品泉第四

山泉數道暗度珠懸而下甘美視惠山而饒平  
遠不品於羽隱君子也

泉每兩輕  
惠泉五分

泉旣清妙遠

道鮮汲間有至者居人以餉餉泉

在寶  
華崗

應之日

飲數斗吾事不旣濟矣乎 按宋蔣堂云堯峰

有顥暹禪師別號寶雲因山間舊井涸枯乃鑿

石造井踰歲僅成旣列而甘大爲叢林之利又  
曰今茲泉眼在魯塢則寶雲井蓋宋時所鑿而  
以僧之別號名井云  
衣荷池漂菰池在露禪庵  
松滋井在平虛庵

游觀第五

橫山芳鄰也湖來妙高峰自穹窿而欲盡登橫  
山而欲無盡

余居支定祠晨起赤日動千波吳江城郭皆作  
輿人曰行路難此最也以城繇吳山嶺以木瀆  
繇鴨踏嶺  
游妙高峰有之多景巖罕矣觀音巖龍洞有之  
鯨吸以下益罕矣

余日夜看太湖無一字說得像羅處約詩逢山  
方得地見月始知天唐桂芳詩水濶疑無地天  
低剩有星高啓詩遠水初涵夜長天盡作秋  
堪輿家言郡治正脉實自太湖諸山以石骨崩  
洪橫列大帳至天池西兌過峽復起大尖轉笏

臨峙天平左帳高景右帳靈巖中抽普庵金山  
穿田再起獅和索山遂變墩阜如金錢散地萬  
點梅花以兌龍從金閭渡峽入城轉亥轉艮轉  
辛出葑阻巨浸而止左枝峙虎丘婁齊其氣自  
西北而南右枝從上方趨尹山逆迴顧榮墓盡  
丫漉村其氣自西南而北近有黃天蕩金鷄堰  
養蔭其間此外復經吳淞江環旋盤繞龍將焉  
往郡邑稱首豈無自哉

勝人題咏第六

蘇州堯峰顥暹禪師僧問學人乍入叢林乞師  
一接師曰去問承教有言是法平等無有高下  
如何是平等法師顥暹曰堯峰高寶華低曰恁  
麼則却成高下去也師曰情知你恁麼又嘗言  
冬去秋來樓閣門開若也入得不用徘徊  
徐源詩月明自宿太湖心咫尺不聞遊此地按  
樂天有寄元稹詩云報君一事君應羨五宿澄  
波皓月中故傲之以堯峰也  
或問依草附木之精靈精靈故有依附如今明

道之士何爲亦自倚物而行答曰明必不倚倚  
必不明今之說者俱謂精靈倚物性靈物倚似  
矣未透也又謂精靈倚物性靈用物透矣未脫  
也余獨曰精靈倚物性靈離物夫惟離物乃能  
用物夫惟用物乃謂物倚故曰離幻卽覺又曰  
致知在格物格者去也去物者離物也不然譬  
者命在杖失杖則顛安保倚者之長爲我倚哉  
所宜祇慎堯峰海性說

廣陵王元祠祀吳越中吳軍節度使錢元璪威

顯公祠祀元璪子節度使文舉二祠俱在薦福  
山壽聖院卽其葬處也

宋禮部侍郎蔣堂墓在橫山魯塢堯峰寺傍

吳邑志

### 草木鳥獸第七

碧玉沼之前文定栢也側有銀杏合抱曰選樹  
兔水院西來栢挺一幹如枯葦掛星栢在真武  
殿寶公塔有古藤焉余所顏掛衲藤也

自度松壑抵露禪菴萬松皆喧松短小而勁特

翡翠巢為最纔三尺爾蓋百年物矣

與福菴種荷花其芋絕佳秋老寒塘可玩也

草之屬 芝蕙蕨

藥之屬 貝母桔梗紫蘇益母五爪龍

羽族 畫眉裙帶黃鸝練鵲鳩雉鷹鷓鴣百舌

山谷所產 虎萬曆初年虎自太湖度 獐兔於菟

欄檻佳賞 荷芙蓉簷蔔桂菊葵百合海棠

木槿

邊豆果實 桃杏梅栗櫻桃楊梅枇杷棗榴

### 日涉園

三益徑	招近局	紅友	一人歸
好郵杯	霜果林	晨裝	從黃綺
在人境	墟里烟	延日	度鳥屏
挈壺至	木葉間	吐嶺	日夕佳
托行雲	客中過	人處宿	
語流鶯	似客星	右山徑	

有黃綺無紅友可乎挈壺至者故人賞我趣也  
招近局松子落也歸雲熟歸鳥熟歸樵熟園日  
涉以成趣也

### 平虛庵

薜荔墻	照莩	松滋井	宿巖
鳥翼幢	泛酒	寒花溜	雲背

坐翠微  
右免水院西

對西洞庭最參差處高峰山如擎

鯨吸巖

堯樽

似乘船

勸飛觴

兩水鏡

栖碧

逢曲

秋浦玉

一漁翁

見秋山

飛紅雨

晚雲髻

酣高樓

採藥崗

響木魚

寒橘柚

右免水

一面南

一

吳江兩水鏡也太湖麴車也橫山以南振五翼  
其北一巨股承之震澤千萬頃以眺東南層波  
未易敵耳晚雲如髻寒雨勸飛觴有石危立一

漁翁也

青莎塢

縫水

虹壁

半輪秋

引碧空

掣電

落鏡

春水舍

夜光杯

觸萍

未眠

帶寒漱

夢中看

漱珠

吾廬

枯木槎

集星躔

彈篁

右免水院南二

枯木橫槎葡萄酒吾廬醉也山月半輪孤帆  
遠引吾廬夢也舍南舍北皆春水吾廬忙也如

天落鏡吾廬開也

喧閣

長雨涓涓 釣夕坪 擁籬沙 水深中  
花積檻 出海曙 獨登臺 學長生  
梁父吟 青楓浦 何處鐘 駐游絲  
泛寒洲 故人情 寒樹遠天 各天  
寫翠 水宿 調砧 右免水院南三

莫喧于風莫喧于鳥莫喧于樹莫喧于雨萬松

之下雲處人家兒女笙篁水宿鳥呼依微遠天

耳

### 家夢

片日帆 畢賞阿 在玉壺 隨去帆  
霞明浪 到家處 長如客 繡佛  
點頭 洛社 暮天垂 日靜谿  
水底眠 右免水院南四

石瘦而並峙家在夢中到家處也夢在家中長

如客也心隨帆影去山河衾裯增一幻矣

### 萬玉隈

劍花 凝霜 臥滄江 雲賞 鷹眼  
青歸 露濯 神羊影 雲滿身  
濺舞階 襯花亭 挂秋帆 峽星  
天回壘 滄溟開 一沙鷗 拳毛騮  
分夕忒 鷹風嶼 鷓鴣筵 三珠樹  
千家小 雨花床 遠山眉 玳瑁梁  
助秋筑 織烟 凌波步 連雨足  
盡滄洲 師飲 住春幌 愁風雨  
雲中闕 青翰 右免水院南五

咫尺愁風雨非愁也痛飲真吾師非飲也天地

一沙鷗不速之客三也濺舞襯花在奇而平一  
帆行處感損山眉

### 天湧巖

綺船 潮白 劔雲棧 吹白 歸烟  
靜寄 彈夜 麈慶跡 葉嶼 皓腕  
濯錦 笳喧 吹鴈嶠 騎影 隴坂  
干峰雨 起漁樵 啣日山 新乳崖  
縮雲鬟 一潭星 翠眼波 流星驛  
駐崆峒 錦苔峯 半篙春 紫玉甌  
右免水院南六

御日山下幾處起漁樵攘皓腕于神泚駕芙蓉  
之綺船我所思兮騎影隴坂忽作關塞極天想

吹鴈嶠如伸五指圍廣數十丈亦曰五老舉

### 勸春襜

元亮徑 紅瘦 舞淪漪 落月家  
抱玉眠 勝友 耐岩客 白雲衢  
萍帶 宿搏 懷謝 烟籠  
花積 右免水院西北

春誰勸月誰落紅誰瘦自平虛菴而南數石如  
舞如奕如坐如拱

### 駐霞城

起松 尋鐘 疊春浦 半花源  
啼榕 聽叟 蘭亭座 排芟塘  
魚床 橫黛 墨雲庄 驅雞岩  
韻野 周鼓 海晴岩 漂花城  
無夢園集 江三 堯峯山

一帆影  
夜歸人  
諸風磯  
兩三松  
翡翠巢  
楓落止  
謹豐砌  
掛夕冠  
古蔓梁  
浪花慢  
夜珠來  
歛水池  
亂寒星  
右免水院北一

駐霞如城啼榕如坐有風徐來驅鷄入雲  
自  
免水院之駐霞城隔竹敲茶韻野諸風一奇也  
浪為幔羽為衣波為步啼榕一奇也牽花紫蔓  
春色如積日暮水漂排芟末也一咏一觴半花  
源蘭亭座一奇也暮鐘可尋為君起松聲一奇  
也借問君何人空山白雲耳

度松壑

青丘  
話雨  
吼雲  
貯陰  
兼葭國  
樓禪  
響露  
稀釣灘  
白竒坡  
瀉鳴琴  
寒淨砧  
夜聞多  
右免水院北二

飛鏡臺

月聽  
坐聞鐘  
飡勝  
問玄島  
客鴈堂  
延月  
覲紅崗  
雲在  
晚花嶼  
脉語崖  
蘆隱  
落寒汀  
梳鶴  
涉烟舟  
古僧居  
弄珠  
秋水席  
來雪  
宿烟潭  
住鷗洲  
聽梵  
經雨橋  
波遠  
右免水院北三

晚風起花雪鷗可住鴈可客飛鏡臺飛明月也

繇經雨橋而下鷗常聽也花紅來覲新蘆隱之  
落寒汀也風波朝夕令人遠矣

### 薺月巖

天地青	杯渡	喻法蓮	對玉峯
對馬鞍山	容聽	酬岳	對玉峯
動日掌	海日關	鳥還	日夜浮
雷轉峯	劈波石	渡虎	引天峯
識香林	水明樓	濤濺	連海岱
夢涼室	花芙蓉	冰梁	還潮洞
古雪	雨果		攢雲洞
右免水院北	四		

贊曰江畔舟如月天邊樹若薺能作是觀流水  
白雲常自在 觀音巖口鳥還也其北薺月也

動日掌之下大士居之夢涼室也虎欲度花欲  
笑梁欲冰也巖之上還潮洞水明樓也與酣落  
筆酣岳也海日引天鳥還之第一峯也懷深詩  
寶陀大士金身現懊惱遊人空看山着眼青山  
非其至也寒潮帶夕殘夜水明繫人秋思鳥還  
一徑橫山五塢寶華疊樹使我不厭遠峯屏之  
劃然一岡浮青夾太湖之兩鏡眺大士巖奇石  
項領自王山蕩而來者多採菱刺魚樵叟也

堯峰露禪庵供米疏

晦堂贊云超玄機於鷲嶺露赤體于龍峰聞時  
富貴去後貧窮涪翁見而閣筆曰不如借水獻  
花與一切人供養及贈花光仁老云大般若手  
能以世間種種之物而作佛事度此有情則一  
枝一葉一點一畫皆是老和尚鼻孔噫嘻艱哉  
真耶戲耶老和尚不可作借水獻花大是難事  
湛公大開堯峰旣示寂性公相公皆能世之魚  
磬日續長者效坡公以怪石供余曰是索諸枯

魚盍田乎性公曰否吾師不裙不視栖毒霧中  
未嘗貧窮莊嚴太虛歲蕤龍象未嘗富貴奈何  
編氓籍田撞擊虛空余曰盍募金錢儲十載糗  
糒乎相公曰否迺謀輦致歲粟而余以少倡多  
計以貳伯爲西江隨其願力伐碑記之陽月爲  
期二公諾焉夫天子食而知宰相之味必侵宰  
相食而知具官之味必曠故有一人之食自有  
一人之味湛公設學字堂者再上下兩庵各以  
經師統之四方雲侶皆識字皆知味矣或曰西  
來不立文字以何供曰以借水獻花供以怪石  
供

...  
...  
...

...  
...

...  
...  
...

...  
...  
...



